


文谷集

九

神道碑銘
墓碣銘
墓誌銘

共十三

~16
2431
9



和
2431
13-9


文谷集卷之十八目錄



神道碑銘 一首

義昌君神道碑銘

墓碣銘 九首



珍山郡守宋公墓碣銘

平市署令蔡公墓碣銘

南陽府使朴公墓碣銘

贈叅判俞公墓碣銘

左承旨宋公墓碣銘

刑曹叅議李公墓碣銘

從姆抱公竄山谷寄寓良家主人翁異公狀貌每食必分之姆虞跡露陰戒公父呼其夫以自晦公瞪目不應一日公夢侍 上前覺而泣嗚咽頃之中使以上命尋公至仍奉以達行在 上喜甚厚賜其主人翁明年隨 駕還京自是 宣祖常置之膝下親授小學論語丁酉倭寇再逞 中殿及後宮先避于關西 命諸王子隨之公日夜戀 上涕泣 宣祖聞而憐之亟召還焉 宣祖大漸御筆遺公書曰予病一朝至此脩短數也爾宜抑情從禮保全性命友愛同氣如予在時縷縷數十言蓋公誠孝天至在諸

王子中最蒙 鍾愛以至憑几之際眷眷致意有如此公既丁 大戚執禮罔愆三年廬于別所始 宣祖新去寇難方厲志興復不許子女治第末年欲爲公營之公辭曰諸兄弟皆無家臣何敢獨受 賜 宣祖益嘉之乃命公私構而捐帑藏助之公就近嬪邸市宅南山下有林壑園亭之勝每佳辰令節與昆弟子姓奉嬪讌游以盡其歡一時豔稱之光海時忌公者宣言宅有王氣公立毀之徙他洞居焉癸丑嬪疾欲公躬執湯劑不解衣而扶持者數十日夜則籲天祈代又斷手指進血及其不諱毀幾滅性喪除光

海幽 母后於西宮公居恒痛傷不欲生已而賊臣爾瞻倡廢 母論勸令宗室文武諸臣獻議可不可公嘆曰臣而犯 上子而讐 母倫紀喪矣終不議相孝純等又承爾瞻旨驅百僚造庭以請一從違卽死生立判公族貴宗多怵迫苟從獨公終不赴人皆爲公懼而不爲動賊臣筠卽公外舅異母弟也公素惡其爲人絕不與還徃及筠逆誅姦黨指公爲其所推戴欲得以甘心禍機危急朝夕且不保賴許夫人周旋百方盡散家貲以求解由是事得已公則不知也然猶錮門廢置者至於六年癸亥 仁祖反正奉

母后復位公始起而謁 上于西宮 上爲之動容特賜內廐馬公旣早被 宣祖所眷愛 元宗大王亦友愛公特殊至 仁祖朝則又屬尊地絕且以仁嬪親子惟公一人所以優禮而寵賚之者世無與兩然公益務爲謙抑下逮僕御歛跡不敢爲非間巷小民或不知有公人以此尤賢之丙子扈入南漢上焦勞不豫累日不進膳大臣以下憂不知所出以上之重公也皆視公公卽入泣請 上始爲之舉匙羣情乃安公嘗兼宗簿寺司饗院都提調御下蒞事寬而不煩事無怠懣而郎吏亦懷之公之疾病

命太醫留視 內賜藥餌食物交於道及喪 襚以御衣文錦吊祭賻贈加常例哀榮之典備矣公豐軀偉姿望之儼然平居非義不爲無聲色狗馬之好惟酒戶甚大 宣祖嘗賜公金杯手書數句語鏤臺面以戒酒有曰戒之戒之母忘予言公終身佩服未嘗敢縱飲也自少耽嗜竹素與都尉尹公新之申公翊聖以文字相琢磨許以知己尤精於八法筆力雄健愈大愈奇一時扁額金石之刻皆以得公書爲寶焉 宣祖宸翰多散落不收公誠心哀聚手摸鏤刻以廣其傳亦可見其孝思也公嘗自號杞泉旣卒 贈

謚敬憲謚法夙夜警戒曰敬博聞多能曰憲許夫人吏曹判書箴之女副提學擘其祖也有懿行哲範宗黨式之觀其出計脫公於禍則其他可推也 仁祖旣入承大統以仁嬪祀事歸公公卒無子 命以麟坪大君潛次子楨爲公後今 上庚申楨坐不軌磬甸 上以公旣奉仁嬪祀其後不可絕改命崇善君澂以嗣公始公之卒也李相景奭爲之文旣刻以樹之神道矣至是 上以前碑所載立後事不可仍以示後乃命臣壽恒改撰碑文以具著其始末其克體聖祖繼絕敦宗之意可謂至矣臣不敢辭謹爲之

銘曰

穆廟之世頌騰螽羽振振諸支亦鮮終譽嗟公懿德
卓冠宗英樂善之風追軌東平質有其文 聖情攸
鍾遇變全彝既孝既忠畏塞蹈危禍追其豆日月重
輝磐石增固地親禮絕 王曰叔父凡世貴家實難
其保公惟謙慎以有令名生莫與尊沒莫與榮 聖
朝敦親聿追 先志再絕而紹世其廟祀豐壤之山
有碑在阿我篆銘詩百世不磨

墓碣銘 九首

珍山郡守宋公墓碣銘 并序

尤齋宋先生有嚴兄曰故珍山郡守諱時默字容甫
年六十八崇禎壬子七月卒其年某月葬于某縣某
鄉某向之原去其葬之四年先生自為狀甚悉屬銘
於安東金壽恒按狀曰公生于萬曆乙巳始生而稀
啼泣轉動稍有知不隨羣兒為戲或默坐竟晷若有
所思念蓋其重遲天性然也長而遊場屋試輒有聲
丙丁以後見天地反覆遂絕意於世力田養親以其
暇不廢佔呻間嘗一 命辭不就至 孝廟之初羣
賢利見大義以明慎獨金文敬公秉銓首陟公濟原
道察訪公始出而仕歷尚瑞院直長司宰監主簿翊

衛司司禦廣興倉主簿出爲縣監者二曰扶餘堤川郡守者二曰益山珍山在濟原疏驛瘠革之驛賴以蘇在益山有言方伯不悅於公公將謝歸方伯力辨其無是公猶以資人頰舌爲耻終辭去乃已其勤於職不苟於去就多類此公爲人質直沈靜慎於動而訥於言含晦不露有善猶恐人知內行純篤事父母以誠不以文父母甚安之以至待昆弟宗族莫不皆然閨庭之內不言而信忠厚仁恕之意常藹如也然與羣弟處雖甚親愛乎辭貌極簡以肅羣弟無或闕語於側尤齋後公二年生自幼相長大旣年位隆重

矣而猶莊事公不敢以顏行進人或疑其已恭公視以爲當然金公益熙嘗曰某丈真可畏人也接人不爲町畦而對之嚴冷鮮諧笑不過數語便寂默以故少親就之者戶外之跡可數也平生不口人臧否至遇不善人偶坐不與言雖隣不與還徃少喜食酒長者欲其語必酒之及長遇酒亦輒醉然竟席未嘗有失言尤持色戒終身無轉眄之失爲官不事皦皦名其治務以實勝之所到吏民信服其居家則以禮飭躬日必晨興謁家廟退而坐一室無故不妄動吉凶之禮悉遵考亭成法最致謹於奉先之儀蓋公天然

朴茂不假修爲而其日用事行畔於道者自寡雖以
尤齋造詣之崇深每歎公資質不可及云宋自麗朝
爲望族祖于恩津者曰天翊至判院事大原始顯入
我朝有號雙清堂者曰愉有隱德不仕五世而至
奉事龜壽號西阜有至行居喪致白燕之異其弟圭
菴先生麟壽妹婿成東洲悌元俱以道義負大名時
人號其居曰三賢間西阜公有子諱應期官都事聘
于李正獻公潤慶之門生諱甲祚號睡翁仕止奉事
卽公考也母曰郭氏奉事自防之女睡翁公有大節
當光海朝以新進士斥折廢 母論獨拜 西官如

例後 孝廟褒贈執義至今學士大夫類能誦其名
正獻公亦聞人素稱有家法郭公當壬辰之難從重
峰趙先生討賊殉義 朝廷旌其間公之先德如此
其鍾美世今有繇也夫公娶奉事李著生女生三男
一女男長基學選補教官次基德次基億女爲韓五
福妻公之二弟俱無子命基億後時燾基德後時杰
基學一男曰宗錫二女適辛相東朴欽基德二男圭
錫康錫一女適李蕃基億蚤塲一女適金鎮望余於
公嘗挹其表而聽其言亦知恂恂長者也今觀先生
狀信然豈所謂不問昆弟之言者哉顧余非不朽人

者謹据其狀而叙而銘之銘曰

天賦於人無有厚薄繇氣之局有純有駁矯偏揉曲必資學力公初稟質渾然大樸惇行寡尤無待乎學曷爲而然世德是毓譬彼崇蘭其種必馥猶玉在璞不刻而琢人有內美鮮不銜飾含章養晦惟公時克全其天賦有光世德我銘斯石以警頽俗

平市署令蔡公墓碣銘

并序

盖我王父文正公之逮虜庭也同時被拘者三人其一仁川蔡公以恒字汝久平生忼慨好義常思以身殉國家之急人或嗤笑而亦不顧也自以世祿之

胄雖在韋布猶可備一卒伍是以聞國有難卽趨赴恐後甲子逆适之變奔詣行在丁卯虜警亦如之至丙子寇深大駕幸南漢公又倡同志杖劍赴之晝伏夜行七日而至城下則長圍數重無以自達唯涕泣彷徨猝與賊遇同志者被搶去公幸而獨脫會嶺南帥閔栾來軍雙嶺遂走其陣爲言山城形便甚悉請得死士數百前驅突圍栾善之而不能用竟敗沒公竄身積屍中得不死又見監司沈演於聞慶以言於栾者言之俄聞媾成退歸鄉里猶憤悒不已進十條疏極論懲前毖後之道上嘉納又上疏陳復

讐之策請移 蹕江都因險固守奏告 天朝乘虛
躡後以圖轉禍爲福以昭大義於天下後世縷縷累
百言無不痛切庚辰虜使至灣上有所噴問姦人申
得淵潛訴我王父及三人爲 中朝效節於是虜索
之急朝議不敢違公聞 命卽告辭家廟促裝就途
詣 闕下自見不知公者始疑其亡匿至是咸驚服
焉 上密教曰爾苟有生路不必固守死志且賜煖
具白金慰藉之良厚公上章謝且曰今日 國事已
無可爲如因臣等之死 君臣上下大加意警動則
雖死亦榮矣中路與弟姪訣不作戚戚色入瀋陽危

辱百端絕不飲食者六七日旣受辭仍幽之北館僅
通水火公處之不爲懾明年出置灣上癸未見釋至
京上疏辭歸未又進戒願勿以摧沮而止其終始拳
拳有如此 上溫諭賜糧而遣之戊子 朝廷念公
前事調繕工監役例陞內資寺主簿出補木川縣監
未幾坐事罷後歷活人署別提司僕寺主簿判官召
村察訪司畜署別提軍資監主簿爲石城縣監被御
史廉問見逮事竟無實 上特原之久之拜通禮院
引儀平市署令所在舉其職木川人刻石頌其惠在
石城獲表裏賞平市素號賄藪獨於公無敢溷以私

公爲人外惇樸而內坦直不修飾邊幅遇不善輒折責之至使人頸赤然見有急難憂之若在已與申得淵同處潘館一暮終不以惡言相加人以此多之公生於萬曆丙申卒於崇禎丙午墓在尚州松峴山午向之原仁川之蔡自麗朝大提學寶文始顯五代祖壽以文章行誼事我 成宗位至大司憲 贈謚襄靖襄靖公退老于咸昌子孫仍世居焉曾祖無逸司諫院獻納亦以直道名祖有光 贈僉正考天瑞 贈叅議妣英陽南國臣之女公始娶慶州金氏陟之女再娶安東權氏克誠之女俱有婦德俱不育取弟

之子之演子之之演有二男一女銘曰

昌黎氏有言無事於職而與國謀若公豈其人耶視世之峨冠肉食而越視君休戚者相去懸矣雖然使公不困厄亦無以就其名豈非天哉豈非天哉

南陽府使朴公墓碣銘

并序

潘陽之朴爲吾東大姓最顯而最多賢其始顯自麗朝直提學尚衷正學大節與鄭圃隱諸賢並稱稱爲潘南先生其子嘗事 本朝爲左議政益大顯又數世而至司諫諱紹以正直好學重士林司諫之子曰大司憲諱應福世推爲長德生子諱東說觀察使號

南郭早負公輔望厄于時未究厥施然其賢聲益彰
徹大行南郭公聘高靈申公撥之女有子三人其季
卽公諱淳字季淵以蔭仕歷官至三品年五十四以
終名位雖未顯世皆稱其賢有祖先遺風云公自少
志氣不羣爲詞章徃徃驚人各名壓曹偶試丁卯進
士果居首俄坐誤一字旋易之士論稱屈癸酉除義
禁府都事不拜選補翊衛司洗馬序陞衛率丙子寇
難奉母夫人奔湖南明年授工曹佐郎拜 命卽歸
已卯爲全州判官公自亂後謝絕公車業不樂仕進
悠然有湖海之志以母夫人年高遂黽勉焉全爲豐

沛大都地廣而事殷監司府尹挈其綱而其政刑繁
碎一委之半刺素號難其職公承上御下以和與信
事無不辦治久之以親嫌遞亡何仲氏大憲公謫嶺
南公求爲玄風縣監以就近蓋承母夫人意也已棄
歸又爲淳昌古阜郡守公爲政務在約已便民不斲
取名所歷四邑持是道不變旣去愈見思或立石以
頌之癸巳丁母夫人憂老而能持制制除視子疾于
京拜繕工監僉正會次對入侍 孝廟目逆而謂侍
臣曰是非某弟耶何其氣度甚似也蓋大憲公最受
知 孝廟先已不幸人皆謂 聖意非偶然也當路

諸公亦惜公才議推轂以當一面擢授南陽府使未
赴而屬疾卒前數日貽書市南俞公託幼孫神思無
少錯訃至士大夫知公者咸齎咨相吊哭之以哀曰
斯人也而止於斯耶公以萬曆癸卯生卒於崇禎丙
申是年三月歸葬靈巖燾峴南郭公墓左以淑人宋
氏祔公凡三娶元配卽宋淑人知中樞駟之女甚有
婦道生男世彙生員女適大司諫李翊次配金氏縣
監永後之女有一女適金一光最後配洪氏直長進
海之女不育生員娶牧使尹衡聖女生一男泰初泰
初二男弼諧弼憲公天資儁邁平居莊重寡言至論

辨事是非確乎不可撓待人不爲毛皮於所善傾心
莫逆見有不善卽規責不面假所交多名流尤以是
慕用焉自痛早孤致孝母夫人苟可以娛適者必力
致之乃已與二兄友愛非游宦未嘗分異中歲相與
築室邊山下晨昏之暇觴詠和翁以極墳簞之樂於
族戚故舊任恤曲有情誼族戚故舊亦親就之記不
佞候公城西僑舍時公疾已病而談論爽朗猶使人
傾聽每念以公其賢而不得志公格以顯榮於世以
爲恨今於不朽之託有不忍辭者况不佞公之通家
子也其又何辭銘曰

寬然其度嶷然其形其行之篤厚其識之通明未究者其才不泯者其名後有徵乎斯銘其必曰南郭公之典刑

贈叅判俞公墓碣銘

并序

觀察使俞公狀其先考行請銘于余曰先君諱汝諧字子和我俞氏于昌原始自高麗寶文直提學涉由直學以來比六世用文科顯有諱煥 贈叅判有諱必毅與金黃岡辛白麓善兩世俱不仕有諱淨副護軍配長水黃氏頤之女是先君曾祖祖考妣也先君既長伯父 贈承旨諱溶無子子之少邁難失學已

舞象猶不識字一日忽發憤受書不數年淹貫經史人皆謂其志必有立也然先君自喪二親不復就公車而李忠肅公弘胄知先君有材力薦授宣傳官轉軍器寺主簿司憲府監察軍資監判官宗親府典簿出補玄風縣監丙子聞 乘輿蒙塵糾官兵赴難與諸子訣誓死無還心俄以按使指還縣而城下報至矣先君痛泣忼慨絕不近聲伎客有請者則曰 國耻 主辱人臣忍娛佚哉考滿歸歷造紙署別提德山縣監漢城府庶尹拜高陽郡守會 孝廟謁 長陵駕早發火暗橋陷墮衛士馬 上甚怒罪方伯守

文名集
令先君亦坐謫西原已而 上有所激加其罪併及
先君移北路之富寧未幾釋又未幾叙屢遷瓦署別
提 宗廟社稷平市署令繕工司宰監僉正不肖瑒
奉使過海 上念先君老特賜食物疾又賜醫藥及
使還又親問先君安否一時榮之先君晚年氣尚王
與諸耆老作真率會良辰壽節往來歡讌白軒李相
公景奭爲詩若文以美之諸名公亦多屬而和者先
君生于萬曆丙戌卒于崇禎甲辰春秋七十九是先
君履歷始卒也先君儀貌魁碩性行淳慤尤篤於孝
友前後喪三年者三而其戚容之稱如一焉先人遺

產悉推與二季而無一毫自私庶母難事事之以誠
卒致化囂爲順其爲郡邑務在約已惠民所至稱治
旣去多見思一心奉公至老遇 國哀猶以筋力爲
禮無或懈焉瑒幸竊科第歷叨中外職先君恒以盛
滿爲戒其有服食之奉輒蹙然不樂恐其病民而悲
其不洎親也遺命喪具母侈不肖等祇奉不敢違是
先君行治之大略也吾妣楊州崔氏副司果澣之女
也爲婦爲母舉可法式先先君二十一年而終墓在
永平金柱山南面巽之原與先君合窆以瑒推 恩
贈先君兵曹叅判兼同知義禁府事妣貞夫人凡育

二男一女男長瑒也次瑾縣監女適士人曹敬輔側室一男二女男珉女適辛錫千一未行瑒娶承旨李惕然女有三男信一進士晦一得一文科二女婿士人趙師中進士金龜重瑾娶坡平尹振坡女有二男準一景一集一二女婿進士南明夏士人朴大需季未字曹敬輔五男一會一周一桂一龜一精內外孫曾若干人是先君子若孫也噫余尚記觀察公赴日本時矣傾朝出租漢上余亦隨其後獲拜公舟中旣夕驪駒在塗送者咸依依不忍舍而竊覲公不色戚惟諄諄囑不辱 命余於是已知公非常人也今觀

是狀益知其所未知其得壽考祚胤也宜哉觀察公謹謹致孝又圖顯刻以垂永久亦可謂能子也已銘曰

竭竭俞公頤而長身有力如虎自持恂恂處家家和爲邑邑理神之福之卒用食子榮享志物旣壽且康振振似續錫衍無疆洞陰之原山屹川澗公歸于是萬禩永寧

左承旨宋公墓碣銘 并序

承旨宋公出牧原州之三年癸丑七月卒于官以其年十月公之諸孤卽其先兆與母鄭夫人合葬于永

平金柱山午向之原既而請銘于潘南朴公世采以
納諸窆矣又六年而建碣于墓道請余爲之銘余故
習於公不敢辭謹按宋之先自高麗進士惟翊望于
礪良遂世爲顯族其尤顯者曰貞烈公松禮礪山君
益孫礪山之孫曰護軍世仁無子以弟叅奉世智子
爲子諱礎監察 贈吏曹判書生諱克訥禮曹叅議
其 贈如監察公公諱時詰字叔保叅議公子也母
清風金氏僉正洽之女以萬曆庚戌生公中癸酉司
馬初授 獻陵叅奉轉 宗廟副奉事尚瑞副直長
改繕工監役坐无妄配臨陂縣始公居考喪旋遭寇

難至是又在謫奉慈諱以歸雖羈旅之際而率禮罔
愆服除除內資主簿遷司評工曹佐郎公蚤業博士
家言旣從蔭仕猶厲志不輟果登癸巳文科選爲兵
曹佐郎司諫院正言遞授刑曹佐郎出爲高山察訪
以正言還又出爲黃海都事微文坐罷由禮曹正郎
陞司憲府掌令改侍講院司書時同春宋公日侍
离筵方懋金華之業公出入周旋多所補助宋公亟
稱之至託爲歲寒交又還正言掌令以司成兼書狀
官如燕還爲密陽府使政先拊循尤拳拳於養老賑
饑至於抑豪右制猾胥威亦不廢 孝廟上賓府之

人士多聞鼓不赴公揭榜曉以大義及後會哭闔境
畢至焉歲餘免歸自辛丑以後爲獻納者六爲掌令
者十一八爲執義五爲司諫間爲尚衣司僕掌樂奉
常軍資諸司長每臺閣有大議論公必與焉或入對
或聯章前後所論列皆關於 君違良瘼賢邪進退
之幾公惟義是視不專主己未嘗爲依違苟避計然
其持論平正不喜絞訐銜沽以爲名人以此益多之
太學諸生請以栗谷牛溪二先生祀聖廟疏入久不
報公陳待士之道又論救諫臣之觸忤者 嚴旨褫
職已而前掌令李稔疏斥新相非人望 上怒黜之

公爭之強 上益怒命兩竄之會有諸大臣言改
命削職亡何特叙擢拜同副承旨從 駕溫泉還拜
廐馬之 賜自是乍遞旋復七入政院轉至左承旨
其爲叅議者刑工二曹而兵曹則爲叅知叅議焉在
政院隨事論辨值兩司劾三公 天威震撼僚席一
空屢繳 成命能不失職責久旱承 命禱雨立澍
又 賜廐馬及爲原州首舉學校之政修造祭器朔
望躬詣將事聚邑子弟廩養而勸課之未幾彬彬興
起丁歲侵悉蠲諸徭賦其不可蠲者以官貯代之良
賴以蘇校其庾得石者尚千餘父老爭言燥髮來所

未見云屬疾將歸墓舍未歸而疾革猶指授州事甚
悉臨終戒諸子益勉友悌論議勿爲已甚訃聞上
賜別賻公爲人寬和淳厚色笑可親平居不修異操
然飭躬有常法日必晨興雖疾必盥櫛至老不惰性
又恬靖絕無要路跡至其奉公一節夙夜恪恭視世
之瘼官自佚者深惡之旣顯仕唯謹守先業一椽一
壠無所增殖有良田爲人所奪有而亦不爲辨也所
交友終身無貳死則存卹其孤以是與之游者無不
愛之其歿也無不哀之者鄭夫人文科牧使之經之
女其賢德具同春公所述誌中有丈夫子七人長光

淹監役次光濂直長先歿次光洵縣監次光浚次光
淵文科歷臺省爲郡守次光澤次光涑生員貳室亦
有一男幼監役三女適尹惟一柳重衍柳遶直長四
男一女男徵獻徵遠徵文一幼女適生員趙錫周縣
監三男四女男徵殷進士徵五徵奎徵殷爲監役後
女適韓始大申處華餘幼光浚一男三女女適李世
璉洪得圭餘幼郡守無子子徵五光澤一女適鄭景
先光涑二女幼內外曾孫男女二十餘人公自少從
事詩書屏去一切外慕其訓諸子亦然故諸子率能
循循力學其進未已人皆知公之後將大顯以蕃也

後之欲知公者徵於此亦足矣銘曰
有焯焯以爲直有皦皦以爲白名之或售其實則疚
孰與宋公其外如中惟其履乎順亦不隕厥問寔公
所以裊身又委祉乎後之人維樹在墻銘與石而永
存

刑曹叅議李公墓碣銘 并序

蓋余讀叅議李公狀而知士之幸不幸有命也公當
光海朝爲臺諫三四輒逡巡退避一無所玷汚又能
言人所難言以大忤姦黨然 中興之初橫被口語
因以困寔竟舍用以沒嗚呼豈非命哉故余述公墓

文於昏朝事尤致詳焉良以悲其不幸也公諱後天
字悠也大司諫 贈吏曹叅判諱士慶之冢子也始
以蔭補掌苑署別提屢遷引儀刑曹佐郎龍岡縣令
擢戊午文科歷戶曹正郎直講司書三入憲府爲持
平皆辭出爲平壤庶尹遞拜掌令時羣凶執 國命
法斲綱淪有金崙林捷者鷹犬於爾瞻且負輿援其
行私益甚公首劾之盡暴其姦狀辭意凜切至云狗
彘不食其餘其黨前知之謀狙擊公不及焉言雖格
不行國論快之鄭公廣成喜謂叅判公曰公真有子
矣每見公必致敬焉已而廢 母論復煽公移疾免

坐此遂阻顯仕槃桓散局遭叅判公憂 仁祖二年
始外除除軍器寺僉正 天將毛文龍遣游擊時可
達領兵入北邊欲襲擊藩胡以要功朝議憂之薦公
爲接伴游擊在途有所疑怒遽督責公公據義諭解
卽其座牒列邑若究核狀而託更衣趨出一面密曉
之曰如此如此又慮爲彼所覺用俚諺爲其書列邑
果對如公指卒以無事其他應變多類此然公終不
自言人鮮有知者及公屢典大州府遇事沛然所到
皆有異績然亦未嘗自言人謂公才固難及而其不
自言尤難及云俄以軍器正擬考官被臺評自是常

求外補歷南原府使大同察訪仁川府使平海郡守
綾州牧使間爲內贍濟用禮賓諸寺正通禮院相禮
及爲蔚山府使齟於御史其人素陰伎嘗有嫌於公
又嘗爲我王父文正公所斥以公王父姻家必欲修
憾百計文致之逮就吏辨白無絲毫實然猶坐罷九
年而始叙復踐諸司長爲海州牧使以母喪去去喪
除 宗廟令 顯廟封世子以相禮例陞通政拜安
東府使考滿再爲刑曹叅議又出爲永興府使踰年
遞又數年卒始考官之論我王父實發之後悔之曰
此吾聽之過也姜相碩期與李相敬輿同閱昏朝史

得公實跡嘆曰吾輩所未悉也然公榮悴之際終始無二色不爲投合進取計有善公者在銓欲引置清選公辭曰吾髮種種矣安能偏側年少間哉當章陵追典主其論者遣人來嘗公啖以美遷公正言責之既久而公議惜其屈屢擬言責又將以喉舌方面處之而終蹉跌不諧公亦老且卒矣信乎其有命也雖然觀公所以自處則詎不益賢乎哉公爲人厚重有器量事父母以順志爲孝與弟留守公至老相友愛有椿津之美次弟蚤亡教育其遺腹子一視已子未見有分寸薄厚周睦親表常舉以訓於家遇人一

以誠信而唯於權要則避之若厲然尤不喜黨論曰交友視賢否當事別是非足矣雅性謙約遺戒喪祭從儉爲詩文援筆立就而隨卽毀其藁 國典月試文臣射居首三者賞緋玉公善射幾命中每試故不肯竟亦可謂加人一等矣嗚呼有此抱負而不大施於世豈獨公之不幸哉李氏世爲龍仁人自高麗太師吉卷始顯有觀察使伯持顯我 朝六傳而爲兵曹正郎蓋忠寔生生員啓仁卽叅判公考也母成夫人昌寧大族父曰郡守希益公生於萬曆戊子十月卒於崇禎辛丑九月墓在揚州時雨峙新兆甲向原

夫人驪興李氏贊成尚毅之女先卒別葬八谷山去
公墓五里自有誌有二男一女男長峻岳曾任羅州
牧使次擬岳卒官坡州牧使俱以循良著女適士人
金萬雄側室三男方岳冠岳勛岳四女爲進士尹世
蕃武科許昇李善揆鄭應祥妻羅牧二男世亨縣監
世貞二女婿李萬亨李延普進士坡牧四男世膺參
奉世白文科縣監世晟生員世勉二女婿權斗章金
夏英金萬雄一女爲柳玆妻方岳勛岳尹許李鄭各
有男女其長者方岳男世範尹之男進士寅明也曾
孫男十五人宜昌宜璋宜相世亨出宜大宜楷世貞

出宜振宜繩世膺出女皆嫁士人餘未名內外孫曾
玄男女摠七十餘人牧使公昆季以通家誼嘗屬銘
於余辭未就而坡牧公遽逝余於是不忍復辭遂垂
涕而爲之銘銘曰

誰之不如而不公卿在古猶然公於何傷維壽之遐
維後之昌維德不爽報理孔章維其令名載于斯石
愈久彌長

贈左叅贊南公墓碣銘

并序

贈議政府左叅贊南公前後視七邑篆皆以治行顯
云始公蔭仕爲北部 慶基殿 恭陵叅奉繕工濟

用監奉事漢城府叅軍軍資監主簿選授稷山縣監
公自一命卽以正己愛物爲心及爲稷山縣故孔
道又新丁國戚民疲於奔命公能櫛垢屣痒一境
歌舞之去又紀其德于石微文罷旋叙兼漢城叅軍
又出爲軍威縣監其治如治稷而精密過之會朝
家虞公隸多漏失大行根刷而嚴其法及列邑上簿
公坐口數少下廷尉問在獄哭後母喪上聞卽出
之猶論配踰年始釋然他邑得無罪率以刻覈故而
公故反是以此威民獨不寃相與閣其碑以頌之久
之連除漣川茂朱縣監治效益著聞由茂朱而令新

溪縣由新溪而守槐山郡皆用恩例也顯考幸
溫陽延見諸耆德訪循良吏同春宋公浚吉特舉公
以對已新溪逋糶事發橫被譴配實無逋也亡何宥
叙平市署令軍器寺僉正擢拜仁川府使國制守
令有年格時公已迫七十選部爲海防難其人請于
上越格以除之公尤單心營職政化大洽乙卯特
陞通政御史奏公治爲一道最賜帛褒美公自以
年至力辭去觀察使以聞上教曰老而尚疆吏民
信愛宜毋遞亟還公遂勉承焉明年竟決歸拜僉知
中樞府事以戊午八月卒所更邑至致千里賻最公

爲政誠實無僞一主於字民而至濕束之節斤斤不
少饒日早衙晏入勤聽斷謹出納凡有祝香常祀必
躬不攝自奉絕簡約歸時蓄積倍舊案而不以一芥
自浼亦不爲進羨傲賞計也所至一此道不易公宜
寧人諱得朋字益吾上世有自中國來者籍英陽其
徙宜寧自高麗密直君甫始本 朝領議政在以開
國勲顯則公之十代祖也會祖諱孟夏不仕而有
名祖諱復始縣監 贈贊成考諱鎮儀賓都事 贈
戶曹叅判聘郡守申汝灌女宅公於萬曆甲辰公爲
人敦厚真率無矯情節貌自痛母氏不逮侍與先君

子不卒養也其事後母如事母而事季父如事父焉
有一弟甚愛推及羣從兄弟而愛之如同氣焉以至
親戚鄉黨交游待之一以悃悞家居未嘗問有無客
至則必酒之至醉布衣時嘗匹馬有所之路遇相識
被賊斫在地其子抱馬首以哭訴時天新曙道少人
賊去且未遠行者皆代怖却走而公獨趨視解衣飲
其屍仍昇致村舍使告縣然後去其急人急多類此
公葬在揚州先山丁向之原配平山申氏祔焉以子
判書公貴 贈今官申氏從封貞夫人夫人士人復
一女壯節公崇謙之後端莊靜淑強記辨事理持舅

喪哀毀動人祭奠必誠以潔至老不懈善理家能忘已之劬而使公忘其貧歷佐郡邑肅清無染判書公少讀書夫人必並坐而手數之讀不竟不先寢每夜以爲恆人比之柳家舍九云後公一年生先公五年卒卒在甲寅五月有一男三女男龍翼卽判書公娶持平蔡聖龜女生一男正重側出三男命重聖重景重二女爲柳星緯妾鄭應妻女長適監察李重蕃生五男泰柱泰相泰楨泰棫泰楷二女塔鄭度均南道揆次適都事慎徽典生一男處重一女幼次適李煇生二男一女正重一男三女並幼判書公蚤關榮塗

再以文詞鳴旣致位八座而公與申夫人猶皆康健每時節慶壽軒駟溢巷薦紳家靡不咨嗟歆豔以歸福於公至公進緋玉則以上推恩卿宰父母也判書公又求守松都奉公往以極讌游之樂世益豔言之然公常兢畏危溢父子相勗爲謹慎後之君子觀於判書公所逢將斯可以知公矣然公治行卓然爲名賢所推 聖主所褒則雖微斯詎不足以不朽哉判書公類公遺行問銘於余余判書公友也因以獲習於公且公除邑在余忝銓之日爲多賴公以不辱筆久矣烏敢辭銘曰

爵有崇於公矣鮮克有壽壽有遐於公矣鮮克有後
後承有多於公矣亦鮮克顯父母人皆歎其偏公獨
享其全匪天私公維善禔躬

翊衛崔公墓碣銘 并序

粵我 孝廟奮發大志擢尤齋宋公長天官博求賢
才以贊治化于是草野遺逸之士咸被選用朔寧崔
公其一也公諱徽之字子琴高麗平章事瑜價之後
我 朝領議政諱恒以文章勲業致大名卒謚文靖
後二世自京遷于南有諱彥粹由太史為正言生諱
穎 贈左承旨生諱尚重司諫 贈大司憲號未能

齋鄉人慕其德俎豆之生諱荇歷臺省玉堂位至左
尹 贈吏曹判書夫人梁氏南原望族主簿俊遇之
女公判書公子也生而警悟自髫髻綴文屬對已驚
其長老十四冠鬢製十五舉鄉解才名日起值世道
晦塞不赴公車及 仁祖改玉始中甲子進士自是
絕意進取唯專心問學焉公性篤孝事親盡志物之
養油油翼翼不忍斯須去側有疾則治藥餌調粥飲
皆自其手不假之人嘗糞甜苦冬月沐浴虔禱其持
前後喪一於禮無違三年足不及中門既服闋日晨
興謁祠堂出告反面如平生事季父承旨公如事父

事諸姑如事母視同氣如手足推以及於宗族恩意
曲盡至有總服而同爨者焉尤謹奉先之禮祭奠必
誠必潔其有外舅姑之喪訖暮年外寢俾婦人得以
自盡知禮者難之公藏修既久鄉黨服其行義屢申
于有司及閔公光勲爲府使承 朝命薦士舉公爲
首初授義禁府都事亡何辭去又除自如道察訪約
已奉公郵卒父母之既歸樹石頌其惠丙丁以後公
尤歛跡遠引不到 京輦二十餘年然遇 國哀必
奔哭焉屢拜 世子翊衛司副率侍直俱不就己亥
大臣儒賢交薦之遂超授工曹佐郎公欲一伸分義

強起謝 恩卽移疾以歸在職僅兩旬見列邑所輸
匠布尺度過長言于長官一從三尺爲準截其餘還
之外方驚嘆以爲前此未嘗有也厥後再除活人署
別提輒辭丙午 春宮加元服簡選僚屬以公爲翊
衛又辭不起戊申 顯廟推恩侍從臣父母之年老
者以公子致翁曾任內翰優賜公米豆公感激 異
數熟以薦家廟又分諸隣里一時傳以爲榮己酉十
二月感疾卒壽七十二臨終猶收歛身心處置後事
索筆手書韻語曰一陰陽一晝夜往來消息盈虛浮
生自有歸處大耋何足嗟歛點畫無少錯亦可見其

素守矣公爲人外溫恭而內耿介不假修飾自然寡
過故其飭躬治家訓子弟御臧獲皆有規度羣居和
易不見芒角至義利淑慝之辨毅然不可奪承旨公
高允少許可嘗曰吾姪實吾師也病世之學者虛偽
無實立心以忠信不欺爲主於紛華聲色一切泊如
顧獨好山水嘗卜築求禮之鰲山構竹爲屋往來尚
羊自號鰲洲與季司諫公約士友爲九老會以倣香
山故事最慕陶靖節風致常諷誦其詩文有曠世之
感公雖遊於丘園乎每語及時艱慨然涕下聞元
子誕生有橫渠之喜至形于吟詠人以是知公非果

於忘世也餘事藻翰工贍過人而亦不屑爲也公之
葬在求禮潺水津上丁向之原元配李氏祔焉李氏
同知中樞惟侃之女 恭靖大王之後也仁恕孝順
得女士稱先公三十二年卒有三男三女男長靜翁
奉直郎次瑞翁次致翁文科司憲府持平女長適叅
奉李文載次適士人盧亨命次有異質未笄而夭次
配南原梁氏佐郎楸之女叅判喜其曾大父也婦道
甚備公之疾病晝夜親自扶救及喪過毀成疾後二
年繼歿有二男一女男是翁通德郎啓翁文科察訪
女適士人金哲靜翁二男與天與友二女適進士柳

文名集
佺士人元聖求瑞翁早幼無子子與友致翁一男五女男與點亦早幼女適宋緯朝盧潤皆業儒餘幼是翁二女啓翁一女二男俱幼李文載二男聖真聖元內外孫曾男女若干人持平君嘗以公狀授余請所以不朽者余既許之而遷延未副忽已踰一紀矣今持平君既不幸而是翁氏又越百舍而來申前請益懇余雖非不朽人者亦何忍已諾於逝者也遂爲之銘曰

公惟名閥襲冕綬公有雋才絕倫匹以茲行世無不達胡然韞櫝守蓬蓽身雖歛藏名則徹履道无咎協

貞吉我銘墓石不愧筆

錦湖林公墓碣銘 并序

我朝士林之禍極於乙巳而乙巳諸賢惟錦湖林公受禍最酷盖公才最奇名最盛持論最峻以故最爲羣姦所仇嫉云公諱亨秀字士遂錦湖其號也林氏出平澤以高麗領三司事禧爲鼻祖其後有忠定公彥脩忠簡公成味世爲名臣水軍虞侯從直僉正萬根北兵使峻寔公會祖祖考也兵使公娶縣監安東權錫之女以弘治甲戌生公幼豪邁不凡十八舉進士二十二擢大科卽薦入史館 仁宗在東宮妙

簡僚屬公為侍講院說書甚被 眷遇選授弘文館
修撰 賜暇湖堂遷兵曹佐郎 詔使華察薛廷寵
來蘇陽谷世讓為僉使辟公從事朝議以北邊饑荒
民困於武吏宜擇遣從臣以責撫摩遂除公會寧判
官言路請留之 中廟不許曰此人有文武才予欲
試邊郡公至則搏心紀櫛凋瘵以蘇藩胡輩亦頌德
歸化必曰大爺後有進貢野人遇我 國使臣語及
公殺死嗟惜不已云入為吏曹佐郎陞正郎屢遷司
憲府掌令司諫院司諫議政府舍人弘文館校理應
教典翰甲辰 中廟昇遐 仁宗嗣位公承 命製

進 大行誌文及謚冊明年 仁宗又上賓時事一
變公以軍器寺正為都監郎視作 山陵俄出為濟
州牧使踰年罷歸一島懷其惠相與攀轅涕泣時
母后臨朝姦臣元衡輩乘機盜乘大鑿士類至丁未
鄭彥慤上壁書起獄為網打計一時名流無得脫彥
慤素忌公勁直與陳復昌合勢蟲附元衡所以擠公
死者無遺力公始 命絕島安置彥慤又獨啓請加
罪 簾中特命賜死公方居羅州里舍聞後 命請
金吾郎入辭二尊人呼幼子教戒處置後事辭氣陽
陽如平日遂就死是年九月也年僅三十四聞者識

與不識莫不痛惜後二十年而爲 宣廟初元首雪
乙巳誣枉公亦復舊官公爲人倜儻偉美風儀尚
氣槩疎宕自喜不拘拘小節然其卓行曠識非曲儒
所敢幾觀於臨命一節可知已既早以詞翰鳴世又
長於弓馬才猷英發靡試不宜當世推爲國器談論
超爽善於諧謔使人灑然傾聽至其嫉惡斥邪無少
顧避其言凜凜刺骨終以是賈禍退溪李先生與公
氣味不同而契許特深每稱竒男子至晚年輒思之
曰安得與士遂相對乎金河西先生亦傷公寃死作
短歌以棟梁材譬之卽此而可以知公矣公文章俊

逸如其人所著散軼有遺集一卷行于世嗚呼天旣
畀公以絕異之才乃又生彼鬼蜮一任其斬伐使不
得究其用吁其異矣然公論之定不待百年其清名
直節著在簡策愈久而彌盛烏足爲公憾哉公之配
鄭氏有一男二女男曰枸縣監無嗣女長適李克成
次適柳景進外孫內資正卿雲李之出琬琢琮叅奉
珮柳之出柳實主公祀收拾公詩文者珮也外裔甚
蕃不盡記公葬在羅州城西興龍洞先兆之側墓道
久闕顯刻今湖南兵使閔暹亦公彌甥也慨然興感
爲鳩工治石柳氏孫叅奉應壽走千里求余文甚勤

文谷集
余於公有曠世之感嘗以應壽之託纂次公遺事以附集中矣今亦不辭而爲之銘銘曰
彼何人斯僂賢自快福不盈眦其骨已碎有過其墓唾其臭穢孰與斯丘芬芳未沫英風爽氣颯乎如其誰不式而不涕灑我筆代鉞以警姦鬼

文谷集卷之十八

文谷集卷之十九目錄

墓誌銘 十七首

仁宣王后寧陵誌

高陽郡守鄭公墓誌銘

副提學靜觀李公墓誌銘

贈持平金公墓誌銘

僉知中樞府事曹公墓誌銘

外舅海州牧使羅公墓誌銘

晉州牧使尹公墓誌銘

刑曹叅議鷗浦羅公墓誌銘

牧使李公墓誌銘

伯姊墓誌

府使柳公墓誌銘

姑淑人金氏墓誌銘

右議政完南府院君李公墓誌銘

牙山縣監李公墓誌銘

永安尉洪公墓誌銘

清風府院君金公墓誌銘

殤兒七龍壙誌

文谷集卷之十九

墓誌 十七首

仁宣王后寧陵誌

仁宣王后禮陟之五月治方中既完我 殿下乃降
 所述行錄命臣壽恒撰進 玄宮之誌臣謹拜手稽
 首受而讀之曰於乎至哉我 聖后之德而 聖上
 之紀之也誠無間然矣既不獲辭則敢就行錄纂次
 而叙之謹按 王后姓張氏其先日舜龍本中國人
 當元時以宣武將軍鎮邊摠管從公主東來仍仕高
 麗累官門下贊成事食采德水縣子孫仍籍焉入我

朝有曰翮漢城府判尹四傳而至玉能文章蚤擢
大魁承文院判校 贈吏曹叅判於 后爲五代祖
高祖諱任重掌隸院司議 贈吏曹判書曾祖諱逸
木川縣監 贈領議政祖諱雲翼刑曹判書亦以魁
科蚤顯後 贈補祚功臣領議政德水府院君考諱
維右議政新豐府院君謚文忠公受知 仁祖策靖
社勲文章德行有大名于世配曰永嘉府夫人金
氏安東望族忠臣右議政文忠公諱尚容之女一時
稱門第者推甲乙焉以萬曆戊午十二月庚辰誕
后于京畿安山之村舍生而端淑不妄游戲六歲祖

母朴夫人取而鞠之嘗隨往季父水原府衙時於暗
中思父母啜泣祖母覺而問輒拭淚對以他辭不使
貽其憂祖母竒愛之 后有兄苦面瘡或言兒矢最
效金夫人陽爲不欲汚手以試 后意 后卽手自
傅之不見厭惡色文忠公大悅而異之蓋其至性自
幼然也崇禎庚午 孝廟爲鳳林大君 仁祖親簡
其配見 后周旋應對有則甚賢之 后遂膺選辛
未秋嘉禮成封豐安府夫人旣入 闕夙夜夔慄孝
敬無違最爲 仁烈王后所眷愛過四年出閣居邸
秉家政綜理井井然梱內事無纖鉅不敢自專 仁

烈王后有姊嫠而窮居 后調掾曲有恩意丙子冬
 寇難入江都明年正月敵兵渡江宮中鼎沸無不號
 哭蒼黃 后獨從容整暇言動不少爽人皆服其有
 守及 孝廟與昭顯世子質于瀋陽 后亦隨行羈
 危險阻首尾九年所處之不失常度 兩宮之間終
 無間言乙酉始返 國昭顯世子卒 孝廟受 仁
 祖命陟儲位册 后為世子嬪 后益自抑畏飭躬
 以禮事 上以誠得一異味必先獻于 仁祖己丑
 仁祖賓天 孝廟踐阼 后既正位中壺陰教益
 彰聽內職帥嬪御和而穆嚴而惠庶幾樛木葛覃之

化然猶小心翼翼持以柔巽常曰婦而自聖鮮不害
 于家國牝雞之戒可不慎歟己亥 孝廟疾惟幾
 后籲天請代逮至不諱哭擗踰禮然於送終之事自
 大溲蚤掬以往雖微必親不委之替御務盡誠信而
 後已未卒哭只歔糜粥我 殿下泣請進食則曰自
 絕其命者誠過矣疆飯以求活亦予所不忍也我
 殿下嗣位尊 后為王大妃辛丑進 徽號曰孝肅
 當册寶之上也 后不欲親臨我 殿下至誠固請
 后亦體 孝廟平昔之教泣而許之行禮之日哀
 動左右至賀禮則竟不受焉每遇災異憂懼形于色

諭我 殿下曰予心猶然爾可忽諸所以誠誨者甚切至 后自己丑大憾過毀致疾遂因以沈痼嘗屢幸湖西之溫陽試湯泉少效至甲寅二月疾忽亟以二十四日戊午薨于慶德宮之會祥殿春秋五十有七有司議謚法施仁服義曰仁聖善周聞曰宣遂上尊謚曰仁宣又加上 徽號曰敬烈明獻先是

孝廟山陵有故至癸丑冬遷于驪州之弘濟洞子坐午向之岡至是遵 后治命以六月初四日 祔葬于其下以其同原而近也因稱以 寧陵 后資性貞靜又襲訓法門動容出辭舉可爲儀範雖疾病燕

私之際必以禮自將對子姓亦未嘗有情慢之色於私親雖甚周睦絕不許曲徑干恩內外截如也 孝廟於麟坪大君友愛篤至 后亦待其夫人一出於誠事 慈懿大妃數十年慈孝無間宮闈之內和氣融洽自 后有疾不得以時進見每歎曰有生何爲大漸之夕神氣已昏瞽忽聞 大妃來臨卽驚悟促進坐席諄諄告訣柔聲和色雍容若平日猶以不飾而見爲恨遷 陵之日 蜃車太重多憂輦士顛殞 后聞之愀然曰 先王在天之靈必不安於此矣及女侍自 山陵還問知傷人無多始有和豫色今

茲六引之舍垣而舟盖亦體 后遺意云 孝廟
之昇遐也雖窮閭僻壤如喪考妣愈久而不忘及
后之薨民之奔走號慕亦如之嗚呼豈無所繇而然
哉 后誕育一男五女我 殿下聘領敦寧府事金
佑明女爲妃五公主長曰淑安公主下嫁益平尉洪
得箕次日淑明公主下嫁青平尉沈益顯次日淑徽
公主下嫁寅平尉鄭齊賢次日淑靜公主下嫁東平
尉鄭載崙次日淑敬公主下嫁興平尉元夢麟淑靜
淑敬並先卒我 殿下誕生一男三女 世子某聘
兵曹判書金萬基女爲嬪女曰明善公主明惠公主

明安公主明善明惠皆未字而天洪得箕一男沈益
顯二男鄭齊賢一男鄭載崙一男一女元夢麟一女
洪惟我 寧考盛德宏規駕軼百王其惕厲奮發以
昭大義於天下者惟 后內贊之功是資我 聖上
仁心仁聞浹人肌髓使域內肖翹之類咸囿於雨露
之澤者亦惟 后慈覆之化是承博厚之德尊配坤
元是宜受祿無疆永享岡陵之壽而昊天不吊遐筭
遽促嗚呼痛哉惟其德音懿烈之昭在耳目者託之
琬琰藏于幽隧將與塗莘之盛並垂於萬禩猗歟休
哉

高陽郡守鄭公墓誌銘

并序

故郡守鄭公諱昌徵字子休迎日人右議政諱維城之冢子文忠公圃隱先生諱夢周之後孫也議政公聘全州李氏生公於萬曆乙卯年二十五選上庠補英陵叅奉義禁府都事並辭又授翊衛司侍直序陞副率遭母喪喪除除內侍教官遷司饗院司僕寺主簿工曹戶曹佐郎由工曹正郎出守高陽郡居三載病遞以甲辰六月卒壽僅五十迎日之鄭胃于高麗知奏事襲明至文忠公相麗季以身殉國倡吾東理學殿食夫子廟庭數世而有諱光胤又數世而有

諱謹承文博士俱有文行俱早世不大遂博士公有子是爲議政公歷事 仁 孝兩朝至 顯考初年陟三事誠忠潔白號稱賢相李夫人監役久涵之女成廟朝壯元直士穆其四世祖也公之配曰南陽洪氏父司憲府掌令翼漢丙子抗章陳大義送虜庭不屈而死公有一男四女男曰齊賢承 孝廟第三女淑徽公主封寅平尉先公歿女長適李世白文科縣監次適任鎮元無子而次適李文佐李秀實寅平生三子一男一女俱夭有一男曰台一外孫男女若干人公爲人惇慎退讓其貌溫溫然其言呐呐如

不出諸口自少孺染庭訓循循不越義方屢從議政公赴巨邑名藩絕無子弟過事親友同氣誠愛篤至愍婦翁禍而無嗣身任其後事而經紀之待人不爲表襮非意之于亦受而不校然見有渙忍者若將浼焉雅尚恬靜一切世味紛華泊然無所好自結姻宮禁常兢兢抑畏益務爲恭儉勤於職事治郡主於愛民而至約已奉法則又斤斤乎嚴也始公力攻博士家業期以趾美續聞而卒蹉跎公車屈志祿仕亦不克究其用知公者咸惜之公初葬高陽古郡以地之不宜至辛亥移窆于揚州高靈山北負亥之原前

後葬皆恩賜寅平塚地也以寅平推 恩贈公議政府左贊成余與公交蓋累世也竊嘗欽議政公清德而又美公之懿行而又愛寅平停峙之姿能稱其家也寅平歿再周而公繼逝公逝數閱月而議政公又不幸三世嬗變不出三年而後先存亡又舛逆如此其視昌黎公三十年而哭馬氏祖子孫者不亦益可悲哉今公從子齊斗狀公行與台一來請銘誼有不可辭者遂攬涕而爲之銘銘曰
襲美乎名父胡施之嗇衍慶乎佳兒胡享之薄命不侔身終古所嗟我銘其懿百世不磨

副提學靜觀李公墓誌銘 并序

蓋余自幼能亡而悲余之無友也非無友也友而無知我者也嗚呼奚獨幼能知我我亦自謂知幼能而今亡矣安能使余無悲也幼能生而名重一世世之知幼能者始則推其詞華旣而嘉其忠蹇又旣而高其恬退終之又尚其進修之篤而然其立心用力有大而遠者則所謂知幼能者未必盡知之也幼能姓李諱端相其號靜觀幼能其字也左議政文忠公諱廷龜吏曹判書大提學諱明漢其王考考也公生于文獻之家幼警穎絕倫作詩語輒驚人鑒賞家稱爲

絕代聲稍長藻思俊逸一時號能操觚者莫敢埒焉二十一魁進士所製膾炙人口踰年而闡大科前後歷敷皆古所稱蘭臺金華木天道山瀛洲之地國
家所設以待文學之士者公所居人無異辭討論纂述彬彬乎其文世且以爲步武盟壇矣然公立朝當官務以弼違繩愆爲任其爲翰林也 孝廟將閱武會 慈聖臨浴官苑其地正眺郊場衆議譁然而難於言公出位論之逆 上指在玉堂劄論 君德無實尤拳拳於待賢之道入對又極言待大臣不敬因訟金弘郁寃死語甚鯁切左右皆縮頸後又疏申

其說並及拷掠諫長之失在臺閣值 上爲 東朝
營殿閣又還自謁 陵路上觀馳射輒皆規諫不以
震撼少撓遇事刺舉無所避貴近憚之有鄭介清者
逆豎汝立黨也湖南人猥祀之書院同春宋公白
上禁毀之凶人善道投疏請張指介清爲正學公辨
斥甚暫 上於親弟喪旣再臨又將越禮親奠公爭
之力 上怒甚譴罷其侍講讀不專章句解詁據經
論事辭剴意明繇是得三昧稱嘗以御史察湖南賑
政發倉理獄皆從便宜又請移船粟之輸京者以哺
之及歸侍 前席歷陳捐瘠狀淚隨言下 上亦爲

之泣獨放悉如公言南良頌其惠于石盖公隨地殫
誠一皆精白懇到以此士論咸重之及 孝廟賓天
公見時事日變遂息意世路闔門謝病有 除命輒
辭再丐外補皆未久召入入又逡巡辭避公嘗自胥
公格則大臣請破除以用之其以事自免則諸名公
又合辭薦公學識可用 上命特叙公益蹙然不安
卽出郊屏居揚州之東岡有終焉之計筵臣推轂益
力 上亦意傾嚮之徵召頻煩而公猶堅臥不起譚
者謂錢淡成四十勇退不爲早也公旣卽閒卽有志
爲已之學日取性理諸書手錄口諷矻矻以爲樂逮

歸東岡用力尤專從游者日衆相與講說琢磨一室
蕭然唯以圖書自衛蚤夜讀而思家貧疏糲或不給
而處之晏如不以芻豢易其味也及其靜養既久聲
實並暢則一世翕然以學問推公而論士之宜在
上左右者指無先公屈望其一出不翅若威鳳儀鴻
也已酉尤齋宋公在 朝奏 上曰今欲圖治不可
使李某在野宜加擢用以長師儒 上遂陞秩以召
之辭不就已而 車駕幸湯泉公自以世臣分義不
可不一伸力疾祇送將卽歸會除玉堂長又因同春
宋公言 命別侍胄筵屢辭始免而公已病不任歸

矣 上聞之賜藥餌公草疏陳謝有曰今茲 貞陵
祔廟實千古盛舉可見 聖學迴出百王願招延賢
德益究大業以光前烈且引南軒遺表中語陳戒切
至蓋 神德王后卽 太祖繼妃而爲 太宗朝諸
臣所貶降至是 上用尤齋言追復舊儀故公疏及
之病革口號短律以見志又以僑寓非正終之所促
還舊第家人諫止不聽還纔踰日而歿觀化之際能
從容得正如此其學力益可驗也蓋公於 孝廟末
年常處 經幄與同春尤齋二先生出入周旋最久
浸灌啓發有由來矣然公默契心得不資師承其學

以徑約爲戒欲先博而後反之凡經傳奧義與夫性命事物之理靡不探賸研窮務盡貫徹乃已然必以主靜居敬爲歸趣平居雖不拘拘矜持考其日用言動鮮有不出於正者少喜詩酒能痛刮舊習絕不作閒吟詠非酬酢人亦不輒飲其勇於遷改多類此見解超詣嘗論大學物格之義其說有前人所未究尤齋亟稱其是於書酷好心經受用最多又留心禮學考訂精博嘗疏論 祧廟改修有違禮意後詢儒賢卒以公言爲正尤喜讀易旁及邵子經世書多所自悟公之於學日進而不已蓋將以盡吾性分以究古

聖賢富有之業非如拘儒曲士安於小成者比則非深知公者曷足以知之公爲人貌癯而體弱又善病如不勝衣然精神奕奕射人與之語纒纒若貫珠叩其底則湛然冰玉無一點塵穢平生無崖異矯激之行然其檢制甚嚴視貨利若浼雖困約無少變昏於女色不以闇昧而弛戒蚤喪怙恃事伯兄如父其病也嘗糞泣禱友羣從睦宗黨訓子姪各盡其道而尤善事庶母與人交有信義隨事責善見有不正者貽書以絕之事 君忠而盡禮 孝廟之喪久處外室其郊居近 寧陵日夕瞻望悲慕每奉 朝旨或聞

有行幸必下庭致敬將命者雖賤隸必禮之以
賓焉一念憂國不以進退致異常以世道污隆賢
邪用舍爲其忻戚甲辰拜憲職上疏累千言大要請
上立志勤學以繼先王之志至其一段則痛陳
儒賢難進之由罄竭底蘊皆人所忌諱者其所指斥
又皆公久要而終不忍以親友故而有隱於君父
因此詆怨羣起公則確然無所悔旣久而人愈思公
言而信公心事云嘗有商舶漂到其人衣冠皆華制
且言正統一脉未絕朝議畏虜噴押解于北京公移
書諸宰極言其不可又作詩以傷之其眷眷宗周又

如此最公資性之美有大過人者故能蟬蛻榮塗一
變至道卓然有所樹立向所稱一藝一節烏足爲公
道哉公始仕承文院爲正字於藝文館自檢閱至奉
教於侍講院自說書歷司書兼文學至輔德於兩司
爲司諫院獻納司諫司憲府執義於吏曹爲佐郎正
郎於議政府爲舍人於承政院自注書至承旨於兵
曹爲正郎叅知於弘文館自修撰歷校理應教典翰
至副提學常帶知製教又嘗賜暇讀書湖堂於外
爲清風仁川府使兩司玉堂最屢踐典翰承旨叅知
副提學俱不拜通籍踰二十年家食殆半之公嘗得

一勝區於東岡之左洞名曰靈芝穿沼築室扁以靜
觀將藏修畢命於斯而天遽奪之矣使公而年其所
就詎可量也吁其可惜也已所著大學集覽四禮備
要聖賢通紀等書皆未及更定有文稿如干卷公卒
于己酉九月距其生崇禎戊辰得年四十二葬在加
平朝宗縣西向之原從族位也李氏本出中華唐中
郎將茂從蘇定方東來仍仕新羅賜籍延安子孫遂
爲延安人我朝文康公石亨以文章名世四世而
至文忠公益以文章德業有大名於世中朝人亦稱
其號曰月沙判書公號白洲繼主文盟爲世名臣母

羅州朴氏錦溪君東亮之女公配李氏全義別姓父
曰右議政行遠生二男五女男喜朝賀朝女長適李
湊次適進士金昌協卽余子次適閔鎮厚次適宋徵
五季未字喜朝嘗以公幽誌屬余而泣曰願得公一
言以文之以爲地下重噫公之歿朴公和叔爲之狀
而尤齋先生爲之墓銘公之行治靡不該矣又奚假
余文以重公然喜朝之請不于人而于余者匪以文
也以余之知公深於人也余能以不文辭不能以不
知公辭遂泣而志之係以銘銘曰
有山之蜿然有丘之穹然有深其泉精光燭天有來

千年人知為靜觀公之阡

贈持平金公墓誌銘 并序

我外曾祖懿愍公有三丈夫子長即我外祖考其季
諱瑄字子溫始 宣祖聘懿愍公女為繼妃是為
仁穆王后懿愍公以褒紀 恩進爵領敦寧府事延
興府院君配盧氏為光山府夫人及 宣祖棄國姦
臣縱史光海主謀廢 母后鍛鍊成大獄懿愍公為
禍首我外祖考與仲氏進士公亦殞於非命公時尚
少獨留繫以待年公見父兄俱不幸痛不欲一日獨
生從獄中上疏言年實應法始不以直對亦罪也請

速就死其辭絕悲楚聞者哽噎至翌年竟遇害甲寅
二月初四日也癸亥 仁祖靖社大滌誣冤 贈懿
愍公領議政及謚公亦 贈司憲府持平金本新羅
宗姓別派於延安高麗四門博士暹漢其鼻祖也其
後歷大將軍俊麟版圖判書景成贊成事祐密直提
學光厚至諱濤密直提學登 中朝制科號曰蘿菴
山人傳子自知開城留後傳子佺內資寺尹傳子友
臣知中樞府事知樞生諱詮領議政謚忠貞公議政
生諱安道縣令 贈左贊成贊成生諱禎司正 贈
領議政寔懿愍考也公生而端穎異凡兒兒時即不

妄言動自知爲學不煩提警未就傳文行已若成人
宣祖甚愛之嘗曰噐宇凝重孝友出天此非叔世
人物也十四舉發解才名奕奕驚一世未赴禮闈而
遭癸丑之禍白軒李相景奭少與公同業公車每稱
公文藝不可及終身嗟惜之不已公生己亥二月十
九日得年僅十六未及授室盧夫人愍其無嗣命我
外祖考次子君錫尸其祀公初鮮葬高陽先兆至癸
亥十月移窆原州安昌里懿愍公墓右負壬之原
仁穆王后嘗親述公行錄今謹据以爲志昔程伯子
識其子墓著賦生不齊之理曰精一者間或值焉其

數不能長亦宜若公豈所謂精一間值者而其使之
不長者人也非天也則豈理也哉於乎益可哀也懿
愍公諱悌男我外祖考諱琰牧使 贈左承旨進士
諱珪 贈如公官銘曰

蘭之苗矣繁霜摧之玉之胎矣烈火煨之爵莘乎一
丘埋此深窞使後之過者徒想像乎瑞彩與竒芬

僉知中樞府事曹公墓誌銘

并序

歲乙卯余禦魅于南寓靈巖之鳩林里卽故僉樞曹
公菟裘也時曹公歿已十餘年其諸子尚居之中里
有亭曰會社修鄉約鄉飲之所也又直數里許建塾

置師聚村秀教之皆曹公所創設以厚俗育才者云里之人類能道曹公事娓娓不能休而其窮羸無告者則又皆追慕其德惠曰安得如曹公衣食我也其長老又爲余言曹公之老而歸也視履尚不衰嘉辰勝日輒擊鮮命酒呼戚執從子姓輕籃小刀以極山海之娛望之若神仙焉公真善人亦福人也余聞而心豔之恨不及曹公在時一稱觴周旋之爲快也已而公之諸子手公狀問誌於余余旣辭不獲則發其狀讀之公早孤屬倭警兄弟俱被執相持爭死賊亦不忍害然伯兄及幼弟後先殞於原隰傷痛終其身

事母夫人能養志幹蠱其奉諱且耳順矣而毀戚踰制人以爲難爲人魁梧倣儻不數數於小節至其赴義好施常若不及所交游盡賢豪長者居內外職以勤辦稱尤長於剽劇游刃有餘一時推爲利器然公剛直自信不肯翫法徇人由是所至數見困滯亦不克究其才識者咸惜之余於是又知曹公修於家試於官者卓卓如此宜鄉人之久而愈思之也按公諱行立字百源昌寧人高麗大樂丞謙之後我朝有策靖國功爲宗簿正者曰繼殷於公爲高祖曾祖別提應卿祖判官世俊考都亭麒麟母林氏系出善

山禮曹正郎渾其考也公少攻文屢舉不偶仁祖
初年始入仕水庫活人署別提禮賓寺直長司憲府
監察內贍寺主簿平市署令軍器寺僉正外則恭仁
衿川縣監益山溫陽郡守孝宗己亥以大耄陞秩
僉知中樞府事壽八十四卒於癸卯五月始葬廣州
後移龍仁金華山坐甲之原夫人清道金氏祔焉夫
人別提胤先之女有令德理家以法先公十五年歿
凡生五男一女男敬彬郡守敬瑋敬璨敬翰敬輔俱
敦行有家風女適鄭公弼孫男一揆一夔一成女李
世剛吳朋錫李衛漢宋夔弼妻郡守出一興成楚相

李成漢安仲孺妻敬瑋出李寅燦李世著妻敬璨出
一遵朴文興李冲謙妻敬翰出一會一周桂一龜
一精尹聖任妻敬輔出益相恭相鄭公弼出內外孫
曾并八十餘人林氏世居靈巖公自少依於外家及
光海時不樂京輦遂盡室南遷晚卜別業於小華山
益有勝致公實考終於此鳩林人思公不已卽里中
立屋以祀之豈古所謂沒而可祭於社者歟銘曰
少而家孝子哉長而官良吏哉老而鄉誠長者哉宜
福之全兮宜壽之延兮宜子孫之繁夥兮華山乎宅
只華山乎窆只公之神無不妥只

外舅海州牧使羅公墓誌銘

并序

壽恒少贅于安定羅公之門周旋甥館垂念載公不鄙夷余其撫愛視子而其相與則知已也雖余之愚無以稱公知愛若公平生之詳則有知人所不及知者焉公爲人豐姿偉軀襟寬而裏明燕居諧笑和怡弛張互見持行不爲皦皦白至裁判事可否一於義不苟與人不置畛域然見有矯飾脂韋者病甚夏畦又以卜其人吉凶後多契驗性篤孝友事親務順其志逮其考鷗浦公時雖少年已自服訓幹蠱祖妣老而失明每值鷗浦公出公輒承奉調護能使祖妣忘

鷗浦公不在側也鷗浦公竄嶺表以卒諸弟咸弱不任事公獨銜恤庀喪扶服返葬鄉山易戚無違禮又能理家秉教育諸弟爲之授室與產母夫人旣晝哭痛不欲生公常與弟妹子姓環侍所以娛悅之者萬方及母夫人見背毀幾不全與弟妹析箸田取其瘠者僮指取其羸殘者諸弟又後先天殞其孤嫠衣食百須皆由公出家世故睦婣至公斤斤無少替宗鄰中表無遠近皆家歸之其在邑割廩以周急寧使已之子寒餓而無或先於同氣寧贍施窮族以速謗而不忍薄於所厚以沽能廉聲尤謹於奉先日晨興謁

文名集
廟出入有事必告祭奠必慤創蠲潔謂世俗輪行非
禮一掃其陋習著爲家法急人之難甚於已於朋友
存卹之尤厚多人所難及者蓋公樂善好義有鷗浦
公遺風云母夫人守夢鄭先生之女首舉男卽公生
而覃訐父母愛之甚爲兒戲有過誤直而不諱鄭先
生亦竒愛之母夫人病口眼貼藥公手奉二晝夜不
釋其純性自幼然也公文藝蚤成游張谿谷鄭畸菴
二公之門弱冠負儁望中罹變故輟公車業晚始爲
親屈志中丙戌進士旋除翊衛司洗馬時有姜氏獄
朝野惴恐公初入賢關倡全恩之論諸生咸愕眙引

去公獨與一二同志將上章呼 閣賊臣自黜惡之
亟官公以沮其論公耻不欲出知友皆懼及禍母夫
人強之始就累轉至翊贊戶曹佐郎出爲鳳山縣監
其俗囂而獷公一切以惠文繩之有奴而背主者附
麟坪大君捏訴公以激其怒遂文致公罪公對簿痛
陳事實不少諱 上怒下廷尉問公又抗辨不撓竟
論奪官然 上猶曰某嘗爲官僚予亦知其善人又
坐他譴配海美俄赦還久之拜尼山縣監爲治惠而
有威平獄訟寬氓征躬駕田野以勞農遇旱禱輒澍
應居三年闔境無遺便時 孝廟大奮發求治尤齋

宋公時烈爲冢宰建言羅某政績爲當今諸郡冠宜先獎擢繼而方伯直指褒聞亦如之於是超遷海州牧使州素號險棘守多以不善去公至則思所以自效祀剔宿蠹殆盡舉粟谷先生鄉約以導民俗仍大修其祠院凡係尊賢養士殫心力乃已屬荐饑多方賑哺又請江都糶自往越海以輸之良賴以無殍公以西土久諱兵慨然稍事陰雨備有無賴子仇州人上變因以並誣公 顯考命勿問致上變者于法亦異恩也無何棄官歸至癸卯十月乙巳以疾卒得年五十其病也有薦良於醫者公以其凶人子斥之

始葬揚州豐壤之家塋後卜果川雨晚山面巳之原以辛亥十月移窆焉公之生也先有夢鵬之異鷗浦公取以爲小字志騰騫也世之君子觀公行能則又謂其必得位與年也然公旣不得志於科目以展布其器業纔少試之而又奪之年天真難諶哉公諱星斗字于天其上祖天瑞麗朝侍中以功食安定安定之羅胄于此我 朝有諱渥爲太史直書金安老惡與二兄湜淑俱著名士類是公高祖也曾祖學諭允忱祖輔德級輔德公以長德稱生諱萬甲有忠孝大節不偶於時位止叅議鷗浦其號也公之配慶州大

姓禮曹判書金公南重之女有三男二女男長明佐
秀而早物次良佐用薦授教官次碩佐向學女長適
壽恒領議政次適李師命觀察使明佐娶吏曹判書
同春宋公浚吉女無嗣良佐娶郡守金天錫女生二
女適士人尹可教鄭壽期碩佐娶郡守具濬女生一
男幼議政六男一女男昌集教官昌翁昌業並
進士昌緝昌立女適李涉觀察二女幼初鄭先生識
鷗浦公於童外許以國器遂以女女焉鷗浦公亦誠
心師事之克有所成就公之趾美踐行得於外氏者
為多鄭先生有所纂近思錄釋疑公屬諸賢訂定並

其遺稿而梓行之且憫外氏嗣絕與羣從疏請于

朝立宗人子以後鄭先生人謂鷗浦公有子而鄭先
生有宅相矣公雖不從事儒學其尚德愛士不翅若
出口在尼山加禮魯西尹公宣舉又遣子從學以此
一時士友爭傾嚮之同春嘗曰某之篤行昔賢不過
也尤齋既以公薦之 孝廟而又銘公墓石稱述甚
備此可以觀公矣嗚呼公之不朽又奚待於年與位
乎哉銘曰

謂天薄公乎而賦之以懿善乎而昇之以脩幹乎而
謂天厚公乎而位之以州牧乎而壽之以半百乎而

淹速者命乎而屈伸者人乎而所自殫者身乎而
聖祖之獎乎而羣賢之契乎而我之銘無愧乎而

晉州牧使尹公墓誌銘

并序

甲寅冬朝論大變一番人用事以禮訟爲禍寗謀盡
毆士類其中首攻尤齋宋公甚急時執義尹公方在
告奮然起就列草啓事將極論之略曰宋某之於
孝廟知遇恩禮復出千古平日對人語及涕淚滿面
是豈貶薄 孝廟者哉以此爲罪不唯某心不服抑
恐國人之心不服也仍斥一二臺官反覆無狀義不
與同席其言絕剴會有潛洩之時人者遂狙擊公去

之不知者或謂公不密然陽諫議無如李繁何則豈
公之咎哉君子於此蓋知公心事云公諱衡聖字景
任上世有高麗按廉使威始著籍于南原按廉之後
代有衣冠高祖時英司憲府執義是生內資寺判官
清是生司饗院叅奉民新有子五人並擢文科 朝
廷用故典歲致廩于叅奉公歿又 贈吏曹叅判其
一諱皓以壯元進官至承旨寔公考也聘全州李氏
贈叅判世良之女生四子公最後生生而嶷然稍
長猶惰於學一聞伯氏教戒卽屈首受書月開日益
自是酷嗜墳典至老未嘗一日去手性又彊記爲文

詞藻思溢發既出游場屋試輒有聲同時輩流謂一第可髭摘而然公扈於公車又遭難流落江湖間市南俞公廢處于鄉邀與同社卜林川之七山耕釣尚羊甚相適也及俞公還朝欲以蔭仕處公公移書責止之壬寅登大科以公格即授成均典籍稍遷工禮兵諸曹郎甲辰屢拜司諫院正言獻納司憲府持平掌令丁未出爲咸平縣監三年自免亡何復入兩司間爲司藝宗簿正侍講院弼善其爲獻納直筵臣之論相臣忤旨者疏論宗戚燕行不宜使中璫護送及公主新庄病良之弊多蒙優納己酉由禮賓

正拜三陟府使卽棄歸辛亥又拜沃川郡守明年以文學召又明年轉輔德司諫與院僚大劾諸宰臣坐遞已僚長被嚴譴而公復除執義司諫引前事屢辭不就顯考大行以執義承命封玄宮及還而駭機作矣公旣敗時輩猶惡之甚又乘銓者素銜公詆已遂黜爲晉州牧使以晉地惡至者多以瘴死故也公夷然之任有來慰者曰死生命也未幾以病罷歸至丙辰七月廿二日暴疾卒年六十九公先是用封陵勞陞通政葬在衿川新林洞先人兆次夫人李氏祔焉公爲人英發軒豁善談論祛表褻居家

與與人處一於樂易任真幼失二親終身以爲痛喪
餘之日雖在遠必設位望哭事伯氏愛敬備至其爲
外宦致甘毳具衣服一如事父者焉叔氏蚤逝奉寡
嫂育孤姪曲有誠意家素窮自奉甚薄歷典膺邑猶
持廉無變獨於人施予無少吝不爲子孫毫髮計也
平生愛一刺不喜交游馳騫立 朝信躬以行無所
阿徇嘗曰白首之年安能隨人桔槔哉前後治郡善
狀不易數而大要主於卹民隱厲風化其興利若嗜
慾字單赤若乳哺擊豪猾治頑囂若蝨賊蝮蛇不盡
法不止也以故在所威愛並行民多追思碑之沃川

人至鏡之崖石以期無甃焉在晉有邑子投疏以煽
士禍者屢踏門求謁公拒不見士人有非罪編配者
矧救之甚厚當困躓之餘虎視者方眈眈而志氣不
少沮如此益可以見公哉夫人系出 太支父曰佐
郎師閔資性溫慈貞靜佐公於約躬緝繡自給及隨
公郡邑又不以一縷浼其治先公五月沒舉男女各
四人男曰耒來東東女生員朴世彙修撰俞命胤進
士金盛遇士人朴泰宇其壻也公貳室亦有一子曰
東耒三男四女男以達以發以弼女長適李燔來一
女東一男一女男以興東一男一女男以大東三男

四女男以顯以遠以煥餘皆幼外孫男泰初朴出男
相基女宋茂錫俞出男時傑時保金出二男三女男
長弼元朴泰宇出內外孫曾摠若干人公嘗顏所居
堂曰百無以志謙虛又書其牖曰六有有慕乎橫渠
也晚而取李白詠君平語以棄棄名其齋則其微意
可知矣噫以公才器既不及蚤顯敷而終又中時之
忌挫摠斥奔不獲究其用以沒惜哉余與公有姻好
久相習也洎余纍嶺海而公獨眷存不替窮途之感
煢煢方寸間今公諸子以幽刻見屬誼有不忍辭者
遂爲之銘曰

觀人有術必觀所與疑疑尹公市翁之侶志不詭隨
所扶惟賢事或蹉跌一心炳然不肖之咀君子攸貞
有如不信請考斯銘

刑曹叅議鷗浦羅公墓誌銘 并序

鷗浦羅公自其考後谷公與我王父文正公甚相善
也至鷗浦公則王父所以許與益深公嘗左符西縣
王父贈之詩期以歲寒後公扞文罔遷嶺表而王父
亦遯于南貽公書勉以世道之責未幾王父拘北庭
聞公之歿則詩以哭之至累篇而以世無快心人爲
嘆及公之墓樹牲繫之石而王父又爲之銘曰忠直

之名與江河同流噫世之知公者或有之矣若其終始所深許莫如吾王父也今公之孫良佐以公壙銘屬余公吾王父之所深許也余小子何敢贅一辭辭既不獲則謹叙其族出官歷嗣續行治而係以銘按公諱萬甲字夢賚自號鷗浦安定人高麗侍中天瑞之後羅本羅州大姓至侍中以功食安定縣子孫因稱以自別安定今之比安也我朝昌陵叅奉世傑有子湜淑兄弟並命於乙巳之禍其季湜爲翰林以直筆忤權姦挫摠以終卽公會祖也祖允忱成均學諭寔生後谷公諱級仕止侍講院輔德世一口稱

厚德長者後 贈領議政配光州金氏叅軍好善之女初後谷公喪子哀甚夢神人報有子且命之名已而果生公以其所命者名之十一而孤不以稚廢戚能自力爲學二十二中進士壯元值光海政亂屏居郊圻不赴公車者十年 仁祖初元授 順陵叅奉旋擢 謁聖文科權知承文院副正字薦爲藝文館檢閱由奉教序陞成均館典籍司憲府監察戶兵二曹佐郎選入弘文館屢爲修撰校理間遷侍講院文學司諫院獻納成均館直講在玉堂借諸僚劄劾趨羶昏朝而長御史者大迂當路指公等爲黨比 上

怒命三人外補公得監江東縣踰年病遞戊辰除直
講兵曹正郎再爲持平三爲修撰薦擬東銓郎當路
者猶嫌公譖之 上上信之亟命遠竄會有大臣言
改配海州明年 賜環還復舊踐拜議政府檢詳舍
人遷輔德 仁穆王后大葬訖用敦匠勞陞還政兵
曹叅知乞養爲安東府使以農月違制奉親坐罷乙
亥拜刑曹叅議遇災上章 嚴旨罷職丙子之難自
田間扈 駕南漢叙拜工曹叅議兼管糧使移叅知
賊退奔省大夫人于海曲尋丁大故時流言倭寇至
公與人士之避地者同賃水營退船以備倉卒旋聞

虛警卽反之會新帥與按道者宿有郤於公相與媒
孽以中之公遂下獄置對 上不用廷尉當竟竄寧
海三年見釋至壬午後十一月丙午卒于榮川旅舍
春秋五十一計 聞復官賜賻如儀前以賞從進嘉
善階又用諸從勲累 贈至左議政明年三月返葬
廣州乾芝山先兆後三十九年辛酉十月遷厝于楊
州治南沙老里卯向之原夫人草溪鄭氏文肅公守
夢先生諱曄之女公少豪逸不羈能馭惡嚙馬好逐
羣兒爲軍旅之事人或憂其訐弛鄭先生一見知其
國器遂壻之公亦痛折節受教先生常以六尺可託

許之夫人孺染家訓公在配德無違公歿教子女有法後公十一年卒祔葬公墓有四男二女男長星斗海州牧使有賢行不大施以歿次星漢星遠星緯並早殞女長適李嘉相及第孝歿次適朴世柱司禦牧使娶判書金南重女生三男二女男明佐夭而無嗣次良佐薦授教官不仕碩佐向學女適領議政金壽恒觀察使李師命星漢娶士人李宗培女無子子碩佐星遠娶同知權順昌女生一男一女男弘佐武科府使女壻縣監宋炳夏星緯娶承旨申翊亮女生三女進士鄭世沃李邦榮金時澤其壻也及第司禦俱

無嗣其所後子李重朝朴泰春也教官二女適尹可教鄭壽期碩佐一男幼議政六男昌集教官昌協昌翁昌業俱進士昌緝昌立一女適李涉觀察二女縣監二男二女金時澤一男內外孫曾若干人公爲人倜儻峻爽貌傑然若不可狎而中實肫肫忠厚於內行特純篤大夫人老而廢視百方娛悅不忍暫去其側居憂過毀幾殆猶自盡於禮每痛蚤孤當祭輒涕覆面宛然孺子慕也推之友悌睦婣皆有加人數等者嗜義如渴尤喜赴人之急有友人逮逆獄將死公身詣廟堂白其寃請以百口保之旣不得則周卹其

文集
妻子竟其身遇不善而斥不少假於其所合輸寫腹
心卽死生無易自少以名節自礪初入上庠與舊進
士相揖古也時據賢關者皆邪黨公醜之不肯就一
榜亦隨而退士論多之靖 社謀既定有來諗者要
與共事公辭以韋布終不赴任疎菴叔英嘗稱確守
儒者常經他人所不及云立 朝務持風裁敢言切
諫屢觸 雷霆彈射不避巨室坐此數躡而不爲挫
至乙亥之疏痛陳 上下諱災矯誣上天且斥椒房
近屬出入宮中無期度仍舉昏朝爲戒雖以是獲譴
一時誦其言而推其直秉臺憲斬斬不撓人不敢犯

禁京師爲肅後 上亦臨朝稱嘆然公言事皆遠識
長慮不顯主激亢始清虜僭號書至朝論甚峻爭言
可絕公獨謂不量力而挑禍失計也或以畏懦謂公
及山城圍急向之謂公者反附麗和議而公力陳死
守之義有疑其中變者公曰前吾所憂正爲今日事
也今之下城拜戎豈前日羈縻比也疑者乃服虜要
我執送斥和臣用事者乘時逞憾指名十餘人以餌
虎口以我王父爲首公見諸大臣極言之且勸三司
爭執繇是多得免公之力也媾將成公入對堅持前
議 不納退至朝堂言曰設不得已 皇朝誥章其

可與乎皮島 天兵其可犯乎此則死不可從座有
悍弁調笑之公正色以對猶慷慨不已其在謫聞
國家助兵瀋陽每嘆曰三百年父母之恩何忍忘之
王父之赴北也扶病徃別爲之悲惋涕泣蓋其忠義
發於天性者然也公有器量饒籌略常留心當世務
不帖帖細瑣前後再典邑僅少試其緒餘而暮月之
間良皆鼓舞風動使公不厄於時以盡究其所有其
文武經濟之業豈不大彰施於今與後哉天之生材
也而遇不遇有命悲夫銘曰

嶷嶷廊廟之器兮噫炯炯 本朝之志兮噫材亦不

必施兮噫忠亦不必以今噫行之寔人所使兮噫奪
之亟奚天理兮噫惟名之永垂無止兮噫

牧使李公墓誌銘 并序

故牧使李公諱挺岳字秀而刑曹叅議諱後天之支
子年十七聘我先君第一女學于王父文正公公丰
度夙茂王父甚愛重之既長力治博士業一時士友
皆期以遠到不幸數竒晚始中戊子生員歷試州郡
最後爲延安府使意有所不樂投印歸家以戊午十
一月癸丑卒年六十四配淑人前一年歿新卜揚州
金村午向之原以葬至是穿其塚而合封焉事訖諸

孤類公行請余爲窆銘記余始孩而公入吾門世親之愛蓋將五十年矣今姊墓草未及宿而公又繼逝余尚忍銘公哉嗚呼余尚忍不銘公哉謹按公龍仁人麗朝太師吉卷之後代有顯人高祖兵曹正郎蓋忠曾祖成均生員啓仁祖大司諫士慶是生叅議公叅議公有季諱後淵早世無嗣其配金孺人我從母也公旣聘而金孺人取以子之公少已有器識丙子之變能先幾遠跡不及於難難定猶棲遑嶺峽久之以親老黽勉還京 孝宗初年選授翊衛司洗馬轉至衛率出補稷山縣監坐微旨謫配藍浦已見釋歷

刑工二曹郎爲牙山縣監嘗銜委至京 上召問良瘼公條對甚悉蒙寬蠲以及一路一路歸惠於公屬歲侵多方調活御史列其善狀 上獎之考滿遭叅議公憂以去去喪除戶曹佐郎金化縣監三年以親嫌遞良建鐵碑以頌之御史至又迎顯公德事聞 上加獎焉由翊衛司翊衛陞瑞山郡守其治如前數邑而益有聲三年又陞坡州牧使旋又以親嫌遞拜掌樂院僉正辛亥大饑疫良死亡且盡京師廣設賑局令重臣主其事公亦膺選爲郎屬夙宵勤劬以粥饑者藥病者而瘞死者各盡其方明年赴延安過

私舶毀淫祠除橫歛之政威惠並流治爲諸郡冠將
去吏良闡道遮留不得則又奔走涕泣公旣長於吏
才每廟堂選良牧銓司擬鉅州巖邑公輒與焉然公
爲政平易不矜飾苛辦以干譽而所至聲實自著公
爲人寬和惇潔外如其中平居子諒惻怛雖蟲豸微
物不忍枉害其素心如是故推之事行一出於誠信
事金孺人終身無迕色金孺人亦愛之如已生常曰
幸哉有子如此有從兄孤而育於叅議公公愛敬視
伯氏無少間見者疑於同產觀乎斯則其餘足推矣
公雅言忠厚不喜爲刻覈之論至當大是非甚截然

在延安聞時事日非輒忼慨憂惋遂決歸志及歸無
復仕宦意當路者多久要戚屬絕跡不與交關曰吾
老矣安能向新貴人乞憐哉公素不事積箸屢更沃
郡家益貧猶處之晏如買田豳州江上爲長往計以
老親在堂不卽就爵爵不自適手書擊壤翁解印本
非嫌薄祿掛冠殊不爲高年一聯于壁以見志子世
白嘗抗章斥邪以居首者坐錮棄官自引去又二子
與舉旛之列亦厭就公車親舊或難之公獨勉之以
義曰時有不可則雖沒齒自廢可也其確守如此然
公晦默不自宣鮮有知其心者其爲長者又如此公

有五男二女男長世膺叅奉次世白文科縣監次世
晟生員次世勉向學第四男慧而殤女適權斗章金
夏英並士人世膺二男二女男宜振宜繩女適趙鎮
恒餘幼世白一男五女男幼三女爲權尚明洪德普
尹溥妻餘未字世晟二男二女世勉一男二女權斗
章二女金夏英二男宜振一男並幼噫以公之賢不
獲顯用於世識者固惜之然世之所謂顯用者可睹
矣以公趣舍本末較之烏可同日論哉我先君姓金
氏諱光燦同知中樞府事 贈領議政安東大族金
孺人系出延安 贈承旨諱珠之女銘曰

位不必隆惟良是利名不必顯義之與比何慕乎外
內省無愧我銘玄石以當鼎彝

伯姊墓誌

吾姊淑人金氏配牧使李公四十七年年六十四以
丁巳十二月卒旣窆諸甥以書若狀請曰願得舅氏
言以文隧中之石余泣而曰余亡余姊余痛斯酷矣
奚忍文亦奚能文蓋閱歲而文未就諸甥復以書請
辭益苦余又泣而曰就使文之余言曷足信於人昔
朱夫子亦嘗誌其妹矣今姊德美于往古無愧而若
余言曷足信於人然終不忍不文則第述其聞於家

庭得於親表州里之言與平昔所覩記者而具著其實庶免於不信也乃輟泣而叙之且以志余痛焉始先君委禽于 贈承旨延安金公之門首舉淑人生而端粹王考文正公憐愛甚嘗與之挑不食問其故對以將遺父母時甫四歲王考大異之曰此何減懷橘兒十歲隨諸親入禁中容止若成人 仁穆王后亟稱非凡兒先君亦曰吾女未嘗見怒色稍長女紅無不習十八歸李氏六親畢賀舅叅議公久而愈嘉之每日賢婦賢婦淑人歸而牧使公出後季父學生公學生配金孺人我先妣妹也視淑人以女不以婦

淑人不以從母故而怠於婦道愉婉夔慄無纖毫違盥金孺人恒語曰使未亡人忘亡者是子與婦也處先後間和而能遜人譬之鍾郝家事牧使公順以正牧使公終身敬重之然淑人不以其敬重故而敢自遂也嘗客嶺南牧使公病瘟幾殆家人皆避徙無他親故省視淑人獨留救晝夜不去側以至良已及後金孺人與牧使公又中瘟其爲之也亦然然淑人卒不染人皆曰庾衮不過也牧使公平生不問家家政一委淑人淑人能身任其勞幹理百須使牧使公忘其貧其有義施或款客應之無靳色前後隨赴五邑

所以佐其廉與惠者非一五邑之人頌牧使公必並
頌淑人無二口及牧使公晚節家食幾乎不舉火淑
人勛心拮据以奉姑與牧使公膳服卽已飢凍不卹
也厚於宗黨隣里調其急不計有無宗黨隣里無不
稱其仁御婢使不輕笞罵家衆依戴之咸曰主母愛
我鞠養諸子不以愛廢誨諸子循循謹飭咸曰是吾
母之教也淑人資性簡靜無惰容無褻言雖不靡靡
然爲聰明而至其辨於義理有過讀書人者不喜紛
華不通干請不惑巫祝左道見有背義耽利者若將
浼焉牧使公自延安決歸營菟峽中爲終老計者

實淑人贊成之也淑人自中年善病久益瘁猶自力
視中饋寢馱遂不起痛哉嗚呼壽恒不夭五歲喪先
妣諸弟俱少獨淑人纔有家字撫諸弟以至于長
成諸弟亦仰之如先妣及淑人佐郡邑痛不逮先妣
養事先君尤盡其誠得一鮮毳必致之時節具衣服
以進推以及於庶母與庶弟妹而無不盡其情焉壽
恒中司馬又中大科淑人輒相持以泣曰胡不令母
氏見之也先君旣棄諸孤而壽恒承乏三事則又持
以泣曰胡不少延先考壽也自壽恒南遷閱數載不
相見淑人每以書來曰生而復見汝死無恨矣語絕

文集
悲不忍讀未幾以訃告矣壽恒平日事姊既無一善
狀而顛沛分析又不得以餘年奉姊痛哉痛哉諸甥
書又云淑人疾革猶以不見余爲恨至哽噎不能言
此尤不忍聞與朱夫子哀其妹者奚異哉天乎其亦
酷矣叅議公諱後天學生公諱後淵牧使公諱挺岳
龍仁望族我金出安東先君諱光燦同知中樞 贈
領議政 贈贊成諱尚寬之子出後文正文正公
諱尚憲左議政世稱其號曰清陰先生承旨公諱琰
仁穆王后兄也淑人葬在揚州金村里新兆去贊
成公墓隔一岡後一年牧使公亦卒遂合祔焉淑人

育四男二女男世膺叅奉世白文科縣監世晟生員
世勉女爲權斗章金夏英妻內外孫具牧使公誌中
嗚呼王介甫銘其兄云酷矣極矣銘止矣其能使兄
傳耶吾於姊亦云

府使柳公墓誌銘 并序

我 國家專用功令用人非此則雖賢且才無得以
進焉至如以儒術勳伐取卿相之位功名著于當世
固無可論然亦一世僅若而人其餘懷材抱器不得
志以歿者豈可勝道哉以余所睹若故府使晉州柳
公其一也公諱時定舊名時英有所避改焉父曰

贈贊成諱燦母崔氏觀察使沂之女萬曆丙申觀察
公任肅川府公實生焉生十歲而喪母哭泣哀悲如
成人觀察公常置膝下奇愛之稍長從權石洲韞學
詞翰日進我王父長湍府君以其女歸之十七中司
馬丙辰海州獄起觀察公首被禍又逮贊成公公奔
走怨號日夜籲天祈解已贊成公又不幸公亦坐徙
春川未袒括而迫逐赴配水漿不入口痛幾絕者數
矣行路至掩耳不忍聞時申文貞公欽謫同壤公造
其門問業甚見眷許至 仁祖改玉昏朝諸寃獄始
大白卽授公義禁府都事轉濟用監直長逆适反扈

駕公山中道 宣諭湖南倉卒從官皆後大臣呼
公至 上前書檄公應口占運筆無一字錯 上目
之曰不意管庫士有此才也陞繕工監主簿掌隸院
司評出補木川縣監公雖少年乎已能精習吏治丁
卯虜警沙溪金先生爲號召使辟公從事觀察使噎
媚誣罷之數年又爲高靈縣監疏上邑瘼四條治日
益有聲坐事免歷工刑二曹郎忠勲義禁二府經歷
爲長城縣監縣舊有山城不修且圯公至則役游手
大治俾塹噲然改觀不以煩一民方伯欲上其勞于
朝公力辭不居坐橫譴謫洪陽踰年見原久之叙

復勲府郎由漢城判官擢拜平壤府庶尹府居西門
孔道最大而劇稱難理公一切痛振刷之豪民猾吏
不敢用其術支吾作三愛堂日聽政其中創置屯田
東西郊以裕畜積治宮奴之負勢而橫者威惠洽一
境 孝廟初服上疏獻謹始六箴其日曰端本立志
懋學尚儉而以親賢遠邪終焉 上嘉納錫文豹以
獎之考將滿病免尋爲南原府使忤閩帥罷又被其
齟至就理鄭公斗卿進言柳某書生軍旅非所習且
其父與外祖俱死寃宜世宥之然竟從吏議配海州
明年赦還又二年授杆城郡守既視篆卽訪民疾苦

疏陳調掾之宜下廟堂議半用半不用亡何移疾歸
至戊戌二月卒臨終屏婦女口號韻語示子弟夷然
若平日四月葬永平先兆某向之原治命也公始字
秀夫及遭家難請改字以自勗我王父文正公命之
曰安世且著說以詒之期勉甚摯後王父銘觀察贊
成二公碑與誌而其稱公則曰有才行尚氣節又稱
公善事繼母母亦視同已出卽此而觀公亦足徵於
後矣然壽恒幸以潘楊之穆蚤承公馨歆公又撫愛
如親子姪不無一二覩記者焉公風骨雋爽秀眉目
美鬚髯望之偉如也持行潔脩自重不喜爲骯骯談

說古今人是非嘆咤激昂若無足當其意者平生惜
一刺勢與要雖親故不往不知者見以爲簡亢而中
實寬豁於其所契卽輸腹心信然諾以此名公賢士
多傾嚮之家居不訾省解官歸行李如往時凡世利
雜技所好不存而至於聲色則尤淡然與吾姑金淑
人相莊至老無貳色其事庶母一如事繼母推之同
氣宗族而無不準焉於文酷好秦漢諸大家不規規
程式以是屢試竟不第善八法尤工小楷駸駸山陰
父子一時山鏡冢刻率多公筆晉州之柳自高麗密
直使彥琛始著其先出文化云我 朝領議政順汀

以靖 國元功封府院君歷三代而有諱重光官監
察寔贊成公考也吾姑與公同葬別有誌有男女各
二人男長庭文科掌令次寢未娶而夭女長適縣令
安廷燾次適生員韓聖與掌令四男昌運成運振運
應運四女婿縣監趙泰期士人金滙吳尚綱李鼎佐
外孫六人纒純紘安之出瑞甲瑞丁瑞巳韓之出內
外孫曾若干人噫以公之有與世之得志以取功名
者計之何獨歎彼哉夫士有遇不遇不繫巧愚乃自
古言之矣銘曰

貴兮富兮彼何人斯才兮行兮公則有之彼皆諧其

須公獨嗇其施其諧一世今其有不浪篆此銘詩今以諭後人

姑淑人金氏墓誌銘 并序

故府使柳公配淑人金氏長湍府使諱尚寬之女世爲安東人高麗太師宣平之後祖諱克孝敦寧府都正曾祖諱生海信川郡守母曰宜寧南氏副司直應井其父也柳公諱時定晉州望族 贈贊成諱燦之子觀察使崔公沂之外孫也淑人生于萬曆癸巳十九歲而字六十六而寡八十四而卒墓在永平府使公葬葬有年其弟之子壽恆泣而爲之誌曰淑人

生而端莊敏慧鍾愛於父母八歲喪南夫人事長湍府君極孝順既歸柳氏姑崔夫人亦先亡府使公育於外氏而贊成公有俞夫人爲之繼室淑人以事其父者事贊成公又以事其舅者事崔觀察至其事俞夫人則又恭爲婦道不知其爲繼也未幾有丙辰之禍崔觀察與贊成公同被害府使公亦配春川淑人從府使公銜哀處困至八年所能力紅作以資給俾不至育鞠焉及從府使公之六邑所到衙門肅然平壤尤稱利藪鮮不爲臆汚有訟者欲行賄緣曲徑嘗之淑人斥之嚴仍告府使公繩以法方伯鄭公致和

與淑人爲中表常嘖嘖曰是不亦女而士哉府使公以是益敬重之淑人理家精勤日晨興坐寢堂命灑掃庭內外指使臧獲斤斤受約束無敢慢自莞篲器用以至厨竈井臼咸秩然整飭尤謹於饗祀遇一嘉果精繫必藏之以須用當祭之夕坐以待事至大盥不變蓋不唯奉先致慤雖卑幼之祭亦然也府使公歿而淑人年幾貳膳矣然持戚甚固每食唯一盞蔬以訖三年值忌日悲慟如初終所遺手札並收而篋之時時閱視涕泣遺命身後附藏焉及長子登第再以專城養而輒愀然曰我何心獨享此於子姓雖甚

慈而義方截然孀姊老而窮數迎於家奉之如母無論友愛睦嫻之誼卽日用細行靡不委曲纖悉無毫髮遺也性又貞介絕人見有少不潔者唾鄙之事或不當意雖親屬切責不少假門族皆莊事之前卒之數日疾已困欲猶記先舅喪餘歷言當時事哽愴不止至曉又問已祭未其至誠不昧如此淑人乳子多不育育二男二女男長庭文科掌令次癯十六而夭女適縣令安廷燻生員韓聖與掌令及二女亦先歿內外孫具載府使公誌中淑人素強少病末年連喪壯子女哀傷慘瘁竟以是終痛哉嗚呼吾姑之亡而

吾先君同氣無復在世者矣唯紀其遺行以傳於後
庶以慰吾之悲也銘曰
茲惟吾姑之室祔于君子永安且吉有石在窆銘之
者其姪

右議政完南府院君李公墓誌銘 并序

蓋當我 仁 孝兩朝之際有貞亮端潔之臣曰議
政府右議政完南府院君迂齋李公諱厚源字士深
我 世宗大王八代孫也 世宗第五子諱璵始封
廣平大君四傳而爲白川郡守 贈判書漢是爲公
之曾祖祖牙山縣監 贈左贊成仁健考鳳山郡守

贈領議政完山府院君郁廣平之子曰永順君溥
有河間東平之美贊成公有弟曰義健世稱峒隱先
生家世俱以行誼聞至公名德益大以顯議政公聘
長溪府院君黃公廷或之女以萬曆戊戌生公公爲
人體羸弱如不勝衣目光炯炯射人剛果內蘊而英
華發外最明於鑑識論人淑慝揣摩事成敗後多如
其言與人語雜以調諧和易可親而卽涉義所否如
以一刀斷下無毫髮依違天性孝友事亡如存事兄
如父御家雖主於恩愛而必以正倫理爲先樂善愛
士如自已出然其是非之辨亦未嘗苟隨蓋其飭躬

奉職唯務自盡絕不要近名也公當光海之末方布
衣年少見彞倫晦蝕 國幾殄祀自以宗戚世臣義
不忍越視協贊同志翊戴 聖祖以再正人紀遂策
勲三等名列茅土尋闡大科歷試中外逮事 孝廟
益被眷毗仍進陟三事至 顯宗初年年六十三以
卒公仕凡歷 三朝首尾垂五十年卒能完名保節
爲善類宗主云公初授奉仁縣監聞逆适反首先勤
王蒙 褒錫戊辰逆豎捕誅公又有勞錄勲旋免
超拜丹陽郡守歷漢城庶尹安山郡守益山郡守乙
亥擢第卽徵爲持平屢轉文學掌令司藝掌樂正以

御史視賑湖西用賞從陞通政同副承旨戶曹叅議
出爲光州牧使踰年罷歸復拜承旨授水原府使病
辭 上以賢且才獎之由兵曹叅知拜忠清監司秩
滿 特命仍任至再爲言路所齟 上以剛明有才
甚慰寵之公猶力辭遞入爲判決事兵戶二曹叅議
北人到境上噴問以大司諫隨諸宰往還復爲承旨
癸未特陞漢城右尹封完南君移諫長拜江都留守
三年遞爲戶曹叅判大司憲忤 旨遞明年除刑曹
叅判與會盟宴陞嘉義以副价修聘虜庭歷都承旨
兵曹叅判兩司長官以安胎使使湖西還爲咸鏡監

文名集
司 孝廟嗣位入拜刑曹叅判屢遷不出舊踐轉大
司成兼同知春秋與修 仁祖實錄兼承文院提調
特陞資憲儼北使疏辭 聖批卿才敏捷智慮周詳
允宜寵擢拜判尹刑曹工曹判書兼帶 經筵金吾
三爲憲長壬辰戶曹判書以鞫獄勞加一階兼 世
子賓客病免 上對近侍問公疾仍曰此人盡心
國事惜其病也再長憲府改判尹禮書癸巳病辭
上不許曰卿職管教士交隣欲久任責效兼同知成
均坐无妄譴罷卽聞郊墅已蒙叙修史訖用勞陞崇
政復拜刑書冬爲吏曹判書明年忤相臣辭遞還禮

曹乙未春奉 命視安興島形便復入吏曹力辭
上曰是予禮未盡而然也廟議委公海防公乞免
上嘆其衰甚而猶不許大政後又辭 御批許以股
肱心膂倚任益隆重而相臣及玉堂交斥不已公竟
自免改叅贊宗伯丁酉判義禁以推刷都監堂上進
崇祿九月擢拜右議政懇辭 上曰卿之才德實合
輔弼明年春又辭 上諭曰卿辭如此予將疇依又
遣承宣諭旨將待公議事竟未赴而遞秋復拜右揆
會 上違豫黽勉入謝冬辭疾去位 上上賓自力
哀臨有洪汝河者投匭專攻公語意絕悖公連章自

劾顯廟斥汝河陰慝以慰諭之庚子二月疾革遂卒公始與義舉只欲存宗國富貴非其志也事定卽還里固辭勲名旣不得則輒隨地盡職及其踐華塗處邇列益蹇蹇殫忠丙子之難亟請發親兵逆擊治殿帥退縮之罪在南漢極言奉駕夜跳非計宜固守以待外援又言世子不可送質國書過爲卑屈仍請罪廟堂痛陳死社稷之義事急世子自請往質公又入對力爭退而痛哭幾絕又聞虜索斥和臣倡諸寮爭執得不濫及焉寇退請誅中外帥臣之後君失律者又請毋罪斥和臣以扶元氣在光

州首覈亂時將校戮其奔北者而賞其終始從軍者前後涖邑按藩大率以寬民力飭戎政正風俗爲務出入喉司至二十餘啓翌弘多如追獎鄭公蘊收叙趙公翼皆其所陳白也仁祖末年權倖柄國朝議淆亂公獨持風裁糾劾無所避孝廟初卽位虜聽凶人蜚語以重兵壓境事機叵測公能密勿彌縫以紓其禍俞公榮議廟號竄逐公力爲論救請流金自黜于外以折姦萌自黜旣迸裔而其黨與復列清要諫官李尚真劾之時論多崖異公爲明其是非又論史官之循私者上不悅至以籍人口斥之公

啓曰 殿下獨不籍臺諫之口乎嶺南人稷等誣毀
栗谷牛溪二先生太學諸生削稷名儒籍激 上怒
再致捲堂會公長國子屢請 上屈已下士至忤
旨去職左相趙公翼疏斥稷疏詖邪反被其醜詆
上批謂大臣不正趙相以此去 國公入對極論兩
賢道德之實詬罵大臣爲 聖德之累 上頗示悔
意言官趙錫胤李慶億非罪被譴公皆爭之 上不
悅及公自劾則 上曰卿之愛予至此自黜謀逆事
發請賞先見諸臣蓋公於陰陽消長之際尤眷眷致
謹焉長度支僅數月旬校之密吏胥信服再秉銓衡

注擬公明請託不行掌 邦禮最久修明典章并并
纖悉 孝廟嘗以金科玉條稱之請交隣必以誠禮
請釐改 太廟樂器請刊行警民編以牖民俗有言
官官不當稱臣於 世子公引古事以明其不然
王妃父母葬日舊無望哭之節公請定式行之有邊
臣密鈎蠻情以聞 上欲賞之公言其不可乃止其
進規於 上每以慎改作崇節儉爲要 孝廟有大
志或親御弓馬公嘗因災異陳戒請 上觀朱子所
撰陳俊卿行狀蓋微指弦激事以諷之也 上亦察
其忠益信嚮之雖 天怒方震而公從容進言則必

爲之和顏聽納焉及登台輔輒卽引退雖不及有所
施設而其見於言議者如請聽鄉人祠朴彭年諸臣
請從臺啓正鄭之問之罪請許太學生序齒之坐或
行或不行而可見其規模大致矣臨終屏去婦人邀
親友論說時事神氣如平日有遺劄語極忠懇上
覽之甚悼曰可不書紳焉太常議公謚合推賢盡忠
清白守節爲忠貞公公自少至老未嘗一日去書不
觀蚤入沙溪金先生之門學禮書大被期許至金文
敬公集尤信愛之目爲知己象村申公欽一見勉以
世道我王父文正公亦稱公剛果嘗尉薦于朝公

最與尤齋宋公時烈同春宋公浚吉滄江趙公涑爲
莫逆交以道義相切劘跡公本末雖其天資過人而
得於師友孺染者居多云公始葬衿川虎鳳谷以地
之不宜至乙丑四月移窆廣州治南細村未向之原
夫人金氏祔焉金夫人沙溪先生之孫父吏曹叅判
槃有婦德先卒有三男一女男週縣令運有才而夭
選以吏曹叅判出爲廣州留守女適右議政金錫胄
蚤歿後夫人辛氏縣監喜道之女有一女適校理朴
泰輔縣令一男三女男山輝叅奉女適金介臣尹道
明洪禹翰留守三男一女男祥輝瑞輝慶輝女適進

士洪禹寧山輝男涉即壽恒壻也餘幼內外孫曾摠若干人壽恒於公通家子也公之長天官又嘗忝為郎僚最蒙愛誨今留守君畀狀屬銘誼有不可辭者仍念自公之卒至今二十餘年世道嬗變靡所不有益思公之好賢樂士扶正辨邪非今人所及也九原不可作噫銘曰

有扶日補天之功而自處若驚有清冰苦蘗之操而猶恐近名燭事物則懸鑑之明堅執守則介石之貞盡節事主主許心膂推誠愛士士歸解宇百世之後有考斯文其必曰昭代之名臣余筆無愧以質幽

窀

牙山縣監李公墓誌銘 并序

國家麟趾之盛莫如世宗朝而世宗諸支惟章懿公後久益昌大云章懿諱璵封廣平大君廣平之子曰承順君諱溥是生諱嶸清安君是生諱千壽定安副正是生諱漢始從仕籍為白川郡守聘雞林君崔漢洪女公諱仁健字強哉白川公之冢子也少力學脩辭屢舉不遂以母老屈意祿仕歷世子翊衛司侍直副率廣興倉義盈庫主簿官止牙山縣監年三十九而卒配青松沈氏領議政忠惠公連源其父

也公爲人恬靖寡默然中實堅確不以外物爲撓見背義趨利者若將浼已篤於內行侍白川公疾數歲扶持藥餌皆自其手不許人代居喪毀而盡禮友愛同氣延無間言平生不事生產不喜紛華常靜處一室以墳典自娛或遇親友輒彈碁叙話竟夕無倦色早贅相門處甥館二十年口不及干請忠惠公甚重之牙山俗囂吏猾號難理公蒞以嚴明大得能聲旣去而民懷之沈夫人生有令質又受教賢父及歸公婦道甚修事舅姑待宗族幹家政無不可爲儀範性識高明其料事達理雖學士大夫有不如也公以嘉

靖乙酉生癸亥卒夫人生後公二年卒後公十一年有一男曰郁鳳山郡守位雖未顯而以行能各世生三男長厚載僉知中樞次厚培府使次厚源文科右議政完南府院君庶出男厚根司果僉樞一男迴文科掌令府使一男迺早沒妾子三人斗實斗益斗命議政公三男週縣令運天選文科叅判二女適右議政金錫胄校理朴泰輔厚根二男遶邊掌令七男重輝永輝俱郡守益輝縣監時輝進士廷輝別檢晚輝兵使遇輝向學縣令一男山輝叅奉叅判三男祥輝瑞輝慶輝內外曾玄孫及壻多不盡記而重輝男濡

文科承旨也議政公以勲業名德致位台鼎推 恩
三世贈公議政府左贊成夫人從其爵公有季曰峒
隱先生義健行義高一世嘗手草公及夫人事行請
願菴宋公寅爲之文以揭諸阡表矣今叅判公又屬
余爲幽誌豈所謂於傳益可保者歟嗚呼士有潛德
隱行蘊而不施於世者必發於其子孫以享其報今
於公尤可徵也銘曰
孰羨其源而流之闕孰培其根而不食實其躬之嗇
其後之羸有如不信視此窾銘

永安尉洪公墓誌銘

并序

近世儀賓彬彬多聞人其以詞翰行誼氣節稱於世
者可歷數也至若德美俱全無怨無讟以能享用福
祿則其惟永安洪公乎公諱柱元字建中自號無何
堂安東府之豐山縣人禮曹叅判 贈領議政諱霽
考也大司憲 贈領議政諱履祥祖考也 贈左贊
成諱脩曾祖考也上祖之慶仕麗朝爲直學士其子
侃都僉議舍人文章節行負重名世稱洪厓先生洪
厓之子若孫俱爲大提學厥後數世室而不顯至大
憲公號慕堂又以經術爲世名臣母夫人延安李氏
以萬曆丙午八月生公幼有器度藻思超絕外王父

月沙李文忠公奇其才教之膝下又令請益于北渚
金公塗有所製語輒驚人故事文衡遞代有所謂傳
心硯月沙公久主詞盟嘗指硯而謂曰他日以此屬
汝其期許如此未冠舉發解聲譽藉甚天啓癸亥選
承貞明公主封永安尉階爲明德大夫公主卽宣
祖大王女也 母妃仁穆王后在光海朝幽閉西宮
十年獨公主侍護及 仁祖反正體 慈聖意親簡
駙馬公卿家子弟多以才俊進而終莫有先公者公
遂膺選焉甲子逆迨之變 上蒼黃出幸會天黑
兩宮道相失公承 命馳詣江滋奉回 慈駕 上

甚喜特加勞賜 駕還賞從進光德辛未 慈殿違
豫 上欲以慰悅加公一階進成祿丙子隨難南漢
又進綬祿己卯宮中有巫蠱獄辭連公家女僕公席
藁 闕下未幾事得已然公杜門屏跡不與外人交
關如是者五年乙酉丁外憂制除入謝 上命黃門
宣醞賜廐馬以寵之 孝宗辛卯 顯廟在東宮冕
迎公爲使者拜鞍馬之 賜公前後屢兼都摠管爲
司饗典設活人冰庫造紙等諸司提調以儀賓而兼
管厨院唯礪城宋公寅及公二人云其爲 祔禮提
調則潛谷金相墳惜公才地撥例特差者也自丁亥

至辛丑奉使赴燕凡至四嘗於 陛辭日 孝廟問
老親年歲疾病慰諭丁寧甲午公使還會趙公錫胤
朴公長遠俱言事竄逐公素與兩公深契且重其爲
人乃上疏極陳錫胤愛 君之誠發於吟詠遠近傳
誦長遠家有老母念子成疾情理可惻引宋朝宥蘇
軾唐宗寬劉禹錫等事論列切至並以趙公詩寫進
上以公干預 國政冒犯 邦憲嚴旨罷職公雖
以言獲罪士論愈益賢之已而首揆鄭公太和承旨
金公益熙入對白 上曰某本內外名家其人亦自
士流不避嫌碍陳其所懷無非爲 國之忠也 上

意稍釋已而叙復原封戊申 顯廟幸溫泉公以
君父遠涉郊野義不可獨後強疾以從明年值 上
違豫日詣 闕起居忽邁風疾至壬子轉徙九月十
四日遂卒春秋六十七在病 上遣太醫齋藥以救
訃聞 特賜秘噐 三殿 東宮各遣中使吊孤蒞
喪贈祭如禮以十一月十九日官庀禮葬于坡州梧
里洞丙向之新兆太常易名曰文懿謚法勤學好問
曰文溫柔賢善曰懿公主有淑德哲範後公十四年
乙丑壽八十三以卒術人言公葬地有忌遂改卜豐
德某里某向之原十月二十八日移公墓而合窆焉

公有四男一女男長萬容再魁文科禮曹判書次萬
衡亦再中文科弘文校理有才行早卒次萬熙進士
司僕僉正季萬恢進士戶曹正郎女適郡守曹殿周
萬容五男三女男長曰重箕叅奉次重範重衍重福
重疇女適進士李大成生員沈龜瑞士人李師亮萬
衡二男重模判官重楷進士萬熙二男四女男重錫
生員重益進士女適士人趙正倫鄭希先生員崔昌
憲士人宋堯卿萬恢一男五女男重聖女適進士李
堦士人尹滌餘幼曹殿周二男夏彥夏奇俱進士夏
章幼內外曾玄男女摠五十餘人嗚呼壽恒自髫髻

幸辱公撫頂之愛每望公儀度丰采秀朗如玉立霞
舉儼然神仙中人也及稍長而出入門牆竊矚公氣
象則篤厚而華雅也寬平而莊重也飭躬則端以方
也接物則和以恭也仍以得公內行之懿則侍叅判
公疾衣不解帶藥必先嘗更九年不懈前後居憂執
禮罔愆當李夫人喪年既不毀矣得疾幾殆子弟泣
請權變而終不聽諱日哭泣之哀若在初終構小堂
於墓下扁以追遠尤齋宋公記其事嘗遷叅判公墓
有灤嚙之變自後每見暴雨水迸輒怵然追思有傷
痛之色友愛諸弟盡誠資恤疾病飢寒視若在已推

以及於親黨恩意周徧無間疏戚丁丑之難公之內弟李公端相被掠在虜陣會公從仁祖出西郊送世子質行請于上尋得之卽捐貲以贖還人皆感嘆樂與諸季羣從爲文酒之會酣暢欵洽鎮日以爲恒雖觴詠諧謔之際而規警不廢好善愛士不以尊貴加人所交游皆一時名勝人無賢愚貴賤無不慕用親向之者自以家世清寒一朝驟居尊貴常存謙挹以布素自持如裘馬聲色之玩田園財賄之利一切不以綴意淨掃一室惟以文學自娛燕中所得例餽盡散之儉隸歸橐如洗平居不喜指斥時政至

聞朝家闕失輒竟夕不怡不以處非其地而忘宗國之憂卽甲午一疏可見也公之文章得月沙公家法猶子幼之於馬遷也爲詩曲寫事情風調兼美每一篇出人多膾炙有遺稿若干卷藏于家墨跡亦翩翩道逸可見其才之備也竊觀魏晉以來禁巒之選尚矣以公平生論之姿容粹美似何平叔神宇清整似王子敬風流好客似劉真長論救直臣以言罹罪又似乎王晉卿至於貴而有禮富而能儉盛滿而能謙則又有諸人所不及者豈不卓然無玷哉判書公昆季以公窶銘屬不佞不佞自念凡可以爲公役

者宜無所辭而第惟尤齋公既銘公墓碑其言信而可徵不佞又奚敢贅一辭謹就家狀撫其碑文所闕略者而特加詳焉仍系以銘銘曰

文章足以煥猷不得鳴於館閣器量足以鎮物不得盛於槐棘謀猷言論足以救時而匡君不得展布於帷幄胡天之與其全而世之有所局惟其名德之顯盛福履之隆赫子姓之昌熾足以垂耀乎無極是固公之自致亦可見天道之不忒我銘玄石昧者之矚

清風府院君金公墓誌銘

并序

我 聖上六年庚申誅除凶逆 宗社再安 上教

曰故清風府院君生而畢忠徇國沒不得與共斯慶予甚悼焉其遣左承旨安績祭于墓粵七年丁卯

上命史官諭臣壽恒曰府院君卒既十三年墓誌闕焉無文予用歎焉以是命卿欽哉已而史官又諭

上旨下公兄子清城府院君臣錫胄所爲狀俾據以爲誌臣壽恒承 命悸恐竊伏念 上之寵銘之者

所以褒顯忠烈匪專爲親懿故而臣與府院君故有四世之好又嘗忝隸太史記賢公卿事行以禪 國

乘職也其敢以辭謹按故輔國崇祿大夫領敦寧府事清風府院君 贈議政府領議政謚曰忠翼金公

諱佑明字以定領議政文貞公諱埴之次子兵曹判書忠肅公佐明之母弟也公生于萬曆己未二月以父命出後從叔父諱址聘恩津宋氏實誕我 明聖王后尊爲國舅凡十有七年以乙卯六月年五十七以卒公以各家子早孺染典訓二十四升上庠力治博士家業屢試不售遂勉就蔭仕 康陵叅奉翊衛司洗馬副率工曹佐郎正郎平市署令掌樂院司宰監僉正富平府使軍器寺副正禮賓寺濟用監正卽其所歷踐也及膺封爵兼尚衣掌樂司導水庫諸司提調五衛都摠管又兼 扈衛大將繇卑至鉅所處

勤其職公爲人敦確剛決有忠孝至行自幼有深愛於父母文貞公每祇役于外雖遠必從左右奉護如成人及長又隨入瀋燕周旋險阻盖不忍一日去膝下也丙子之亂避兵海嶼公親負母夫人出沒崖澨至閱數晝夜脚爲腫爛侍母夫人疾日久不懈雖命之退不敢退退猶屬耳戶外以候氣息安否文貞公疾欲灸百會公亦灸百會以均其痛夜輒搏額禱北斗旣不效則又斷指以進血及文貞公捐館而公所後祖母白氏與母夫人繼不幸公半年而罹三創哭泣不絕聲一夕髭鬚盡白已 孝廟又上賓每遇朔

望公與忠肅公必晨起向闕哀臨而後始進奠几筵以訖三年至練祥則前一日必齋沐冠經坐廳下終夕以待雞鳴將事後值諱日亦然不見其以倦繼也私制既除矣而以方喪猶未盡也兄弟共外寢蔬食以終其月其至誠疆力人皆以爲難於忠肅公友而敬常同處湛樂有春津之美母夫人既棄養則推其所以事之者以事姊黃淑人而以尹氏妹之鍾愛於母夫人也資恤有加忠肅公沒公益自傷孤露上疏陳情辭意絕悲楚顯考覽而悽然特許任便省墓公既得命時時匹馬詣墓下涕泣灌薦見者感

動公又篤於追遠嘗之海西觀先世遺基徃嶺南謁六世祖生員公墓又還至清風訪始祖侍中公塋域不得而後返亦孝之推也公平居忼慨激昂毅然有忘身死國之志遇事有不平卽中噎必吐乃已雖局於邦制謨猷無所施然公自以義共休戚不忍以身之處嫌而自外於君父每有所懷必披露無隱雖屢被訾詆而亦不恤也逮聖上踐阼公屬益尊位遇益隆重顧益兢兢危懼又見上方冲年亮陰而一番人乘時盜秉欲變亂舊章公常咄咄憂懣當寧陵之遷也侍衛承旨旣錫馬酬勞而至是

大臣又追請增秩公以爲此殆薄 先朝賜予又有以守 陵官資廩過豐請加裁削者公以爲此非所以重 陵寢意也輒上劄言其不可當路者固已目攝之始槓柎兄弟三人自 孝 顯兩朝席寵恃眷出入禁中無期度漸肆爲驕淫至 大喪之初柎又代奠 殯殿居宿于內因以圖竊威福陰結朝紳以通其論議又有諸舅族黨賓客爲之羽翼聲勢已張人莫敢指斥公覺之曰此蔓難圖也乃密草疏發柎桎與官人交亂狀仍歷陳 先王及 慈聖所嘗駭憂之由請 上酌恩義處之使得歛畏自新疏上其

舅挺昌誅其黨鑄穆遽入對請召公至 闕究問其言根鑄穆俱槓柎客也意在迫辱公以爲槓等兄弟地公恐懼徑詣金吾待 命 上遣史官諭公歸第是夕 慈聖又親諭大臣於是大臣始請槓桎罪而猶依阿不盡法自是凶黨仇視公以至上浸 東朝鑄既有管束 慈聖之請洪宇遠又假家人卦爲內外正位之論其餘迭進不道之言者前後相踵至朴憑疏語尤悖慢義理幾乎熄矣公杜門謝客唯朔望陪 祭問 安而已日親近杯酌有時悲憤涕泣遂以成疾疾革精神猶不爽顧清城公而曰今之臣子

其無論憲罪者乎噓唏不已訃聞 上震悼輟視朝
二日 四殿各遣中官護喪舍殮百須悉出 大內
自初終至窆官庀之凡所以隱崇者無不備公既卒
槨柩輩益無復顧忌表裏盤結爲邪謀益密至庚申
禍迫呼吸清城公與一二同志沈機默幹轉危爲安
於是逆宗凶豎長弟伏法 上乃思公之忠既特舉
曲江之典又命太常考謚法合危身奉上思慮深遠
以易公名仍錫宴以侈之嗚呼公徒眷眷 宗國之
危不計身之利害死生言人所不敢言欲以杜禍萌
固 國勢使上下並受其福而顧乃有不然者悲夫

然其純忠血誠可質鬼神亦足以愧世之沈酣富貴
而越視國存亡者矣我 聖上追念表章愈久而彌
篤者豈非所以獎先見厲臣節以垂後戒者耶公於
是乎可以自慰於泉壤矣公清風人在麗朝有諱大
猷始顯卽侍中公也我 朝已卯各臣有大司成諱
湜於公五世祖也大成生諱德秀 贈吏曹判書生
諱棊軍資判官 贈左贊成生諱興宇生員 贈領
議政三世有隱德室而不達議政公寔生文貞公名
德始大顯母夫人坡平尹氏 贈參議汲之女也贊
成公次子曰興祿亦 贈贊成其子址 贈領議政

卽公所後考也宋夫人府尹國澤之女有婦德封爲
德恩府夫人先公卒自有誌葬在春川治西安保驛
村負亥之原公卒穿其塋而合封焉公有四男二女
女長卽我 明聖王后誕我 主上殿下又有三公
主明善明惠並天明安下嫁海昌尉吳泰周男長萬
胄蚤沒 贈左承旨次錫翼左尹次錫衍叅議次錫
達判官女次適縣監權益興萬胄無子以錫衍子道
濟爲嗣主公祀錫翼一女適士人洪重衍有妾子五
人錫衍五男一女男長道濟次道涵道泳道浹道滄
道泳出後錫翼錫達亦蚤沒無子權益興二男一女

皆幼公側室有五男二女男錫賤錫考錫悌錫善錫
順女適李志完次幼清城公所爲狀詳而不溢可徵
於百世矣 上之命臣据此而爲文者意實在此茲
故不敢贅一辭謹就狀所載略加序次以應 明旨
仍念公卒未十年而 慈聖奄棄臣良旣而清城公
又下世公之諸子亦相繼凋殞人事之嬗變至此而
國勢亦日以孤危矣俯仰今昔垂涕而爲之銘銘
曰
若稽往牒臧否后家不與朝政人所稱嘉公於斯義
夫豈或昧至誠激發靡暇嫌畏矧伊時勢常變有殊

唯義所存寧可一拘當公之時亂宗辟睨禍在心腹
國命旒綴公而不言疇遏其勢言格力屈終以身
斃孤忠炯炯有淚映睫世道重亨嗟哉何及 聖主
追褒匪爲私恩銘以述之昭示無垠

殤兒七龍壙誌

七龍者安東金壽恒之幼子也其父獲戾于 朝竄
于湖南之靈巖郡其母亦隨至乙卯十二月十六日
生于鳩林之村舍其父名之七以序龍以夢也生二
十一日而死埋于西南十里許清寧洞始兒骨相異
凡意其不偶生也髮未燥而旋夭豈非坐其父餘殃

也其父越禮而哭之自書此納諸窾志其哀也系曰
蓁蓁南土哀汝殤之爲旅鬼百歲之後人知爲金氏
之子尚無踐毀也

